

漢書門  
四七一號  
三六函  
四架  
六冊

內閣文庫  
漢書  
四七一號  
三六函  
四架  
六冊

內閣文庫	
番號	漢 4712
冊數	69 (60)
函號	362 69

0 1 2 3 4 5 6 7 8 9 10

Kodak Gray Scale  
A 1 2 3 4 5 6 M 8 9 10 11 12 13 14 15 B 17 18 19

G Y M

© Kodak, 2007 TM: Kodak



縦じ部(喉部分)の文字など開きが不鮮明な箇所あり



文翰類選大成卷第一百四十一表目錄

漢

班孟堅 三道

孔文舉 一道

諸葛孔明 二道

魏

曹子建 一道

晉

李令伯 一道

羊叔子 一道

劉越石 一道

陸士衡 一道

庾元規 一道

張士然 一道

桓元子 一道

殷仲文 一道

宋

傅季友 二道

齊梁

任彦升 五道



唐

房玄齡 一道	張道濟 一道	高達夫 一道
岑仲華 一道	武平一 一道	顏清臣 一道
李翰 一道	韓退之 二道	柳子厚 一道
陸敬輿 一道	吳少微 一道	

文翰類選大成卷第一百四十一表目錄

文翰類選大成卷第一百四十一

左長史上海李伯璵編

紀善慈谿馮厚校正

表類

漢

異姓諸侯王表

班孟堅

昔詩書述虞夏之際舜禹受禪積德累功洽於百姓攝位行政考之于天經數十年然後在位殷周之王乃繇高稷脩仁行義歷十餘世至于湯武然後放殺秦起襄公章文繆獻孝昭嚴稍蠶食六國百有餘載至始皇迺并天下以德若彼用力如此其艱難也秦既稱帝患周之敗以為起於處士橫議諸侯力爭四夷交侵以弱見奪於是削去五等墮城銷刃箝語燒書內鋤雄俊外攘



胡粵用壹威權為萬世安然十餘年間猛敵橫發乎不  
虞適戍疆於五伯閭閻偏於戎狄嚮應瘠於謗議奮臂  
威於甲兵鄉秦之禁適所以資豪傑而速自斃也是以  
漢亡尺土之階繇一劍之任五載而成帝業書傳所記  
未嘗有焉何則古世相革皆承聖王之烈今漢猶收孤  
秦之弊鑄金石者難為功摧枯朽者易為力其勢然也  
故據漢受命譜十八王月而列之天下一統迺以年數  
訖于孝文異姓盡矣

諸侯王表

昔周監於二代三聖制法立爵五等封國八百同姓五  
十有餘周公康叔建於魯衛各數伯里太公於齊亦五  
侯九伯之地詩載其制曰介人惟藩大師惟垣大邦惟  
屏大宗惟翰懷德惟寧宗子惟城母俾城壞母獨斯畏

所以親親賢賢褒表功德關諸盛衰深根固本為不  
可拔者也故盛則周召相其治致刑錯衰則五伯扶其  
弱與共守自幽平之後日以陵夷至庠院隘河洛之間  
分為二周有逃責之憂被竊鈇之言然天下謂之共王  
疆大弗之敢傾歷載八百餘年數極德盡既於王赧降  
為庶人用天年終號位已絕於天下尚猶枝葉相持莫  
得居其虛位海內無主三十餘年秦據勢勝之地騁狙  
詐之兵蠶食山東壹切取勝因務其所習自任私知姍  
笑三代盪滅古法竊自號為皇帝而子弟為死夫內亡  
骨肉本根之輔外亡尺土藩翼之衛陳吳奮其白挺劉  
項隨而斃之故曰周過其歷秦不及期國勢然也漢興  
之初海內新定同姓寡少懲戒亡秦孤立之敗於是剖  
裂疆土二等之爵功臣侯者百有餘邑尊王子弟大啓



九國自鴈門以東盡遼陽為燕代常山以南太行左轉  
度河濟漸于海為齊趙穀泗以往奄有龜蒙為梁楚東  
帶江湖薄會稽為荆吳北界淮瀕略廬衡為淮南波漢  
之陽巨九嶷為長沙諸侯北境周而三垂外接胡越天  
子自有三河東郡潁川南陽自江陵以西至巴蜀北自  
雲中至隴西與京師內史凡十五郡公主列侯頗邑其  
中而藩國大者夸州兼郡連城數十宮室百官同制京  
師可謂橋枉過其正矣雖然高祖創業日不暇給孝惠  
享國又淺高后女主攝位而海內晏如亡狂狡之憂卒  
折諸呂之難成太宗之業者亦賴之於諸侯也然諸侯  
原本以大末流濫以致溢小者滯荒越法大者睽孤橫  
道以害身喪國故文帝采賈生之議分齊趙景帝用晁  
錯之計削吳楚武帝施主父之冊下推恩之令使諸侯

王得分戶邑以封子弟不行黜陟而藩國自析自此以  
來齊分為七趙分為六梁分為五淮南分為三皇子始  
立者大國不過十餘城長沙燕代雖有舊名皆亡南北  
邊矣景遭七國之難抑損諸侯減黜其官武有衡山淮  
南之謀作左官之律設附益之法諸侯惟得衣食稅租  
不與政事至於哀平之際皆繼體苗裔親屬踈遠生於  
帷牆之中不為士民所尊勢與富室亡異而本朝短世  
國統三絕是故王莽知漢中外殫微本末俱弱亡所忌  
憚生其姦心因母后之權假伊周之稱顛作威福廟堂  
之上不降階序而運天下詐謀既成遂據南面之尊分  
遣五威之吏馳傳天下班行符命漢諸侯王厥角稽首  
奉上璽鼓惟恐在後或迺稱羨頌德以求容媚豈不哀  
哉是以究其終始疆弱之變明監戒焉



高惠高后文功臣表

自古帝王之興曷嘗不建輔弼之臣所與共成天功者乎漢興自秦二世元年之秋楚陳之歲初以沛公總帥雄俊三年然後西滅秦立漢王之號五年東克項羽即皇帝位八載而天下迺平始論功而定封訖十二年侯者百四十有三人時大城名都民人散亡戶口可得而數裁什二三是以大侯不過萬家小者五六百戶封爵之誓曰使黃河如帶泰山若厲國以永存爰及苗裔於是申以丹書高其位大其寓愛敬飭盡命賜備厚大孝之隆於是為至至其沒也世主歎其功無民而不思所息之樹且猶不伐况其廟乎是以燕齊之祀與周並傳子繼弟及歷載不墮豈無刑辭繇祖之竭力故支庶賴焉迹漢功臣亦皆割符世爵受山河之誓存以著其號

亡以顯其魂賞亦不細矣百餘年間而襲封者盡或絕失姓或乏無主朽骨孤於墓苗裔流於道生為愍隸死為轉屍以往况今甚可悲傷聖朝憐閔詔求其後四方忻忻靡不歸心出入數年而不省察恐議者不思大義設言虛亡則厚德掩息遼東布章非所以視化勸後也三人為衆雖難盡繼宜從尤功於是成帝復紹蕭何哀平之世增修曹參周勃之屬得其宜矣以綴續前記究其本末并序位次盡于孝文以昭元功之侯籍

薦彌衡表

孔文舉

臣聞洪水橫流帝思俾乂旁求四方以招賢俊昔世宗繼統將弘祖業疇咨熙載群士響臻陛下獻聖纂承基緒遭遇厄運勞謙旦夕惟岳降神異人並出竊見處士平原彌衡年二十四字正平淑質貞亮英才卓犖初涉



藝文升堂觀奧目所一見輒誦於口耳所暫聞不忘於  
心性與道合思若有神弘羊潛計安世默識以衡準之  
誠不足怪忠果正直志懷霜雪見善若驚疾惡若讎任  
座抗行史魚厲節殆無以過也鷲鳥累百不如一鶚使  
衡立朝必有可觀飛辯騁辭溢氣全涌解疑釋結臨敵  
有餘昔賈誼求試屬國詭係單于終軍欲以長纓牽致  
勁越弱冠慷慨前代羨之近日路粹嚴象亦用異才擢  
拜臺郎衡宜與爲比如得龍躍天衢振翼雲漢揚聲紫  
微垂光虹蜺足以昭近署之多士增四門之穆穆鈞天廣  
樂必有奇麗之觀帝室皇居必畜非常之寶若衡等輩  
不可多得激楚陽阿至妙之容掌技者之所貪飛兔騷  
裏絕足奔放良樂之所急也臣等區區敢不以聞陛下  
篤慎取士必須効試乞令衡以褐衣召見必無可觀采

臣等受面欺之罪

出師表

諸葛孔明

臣亮言先帝創業未半而中道崩殂今天下三分益州  
罷弊此誠危急存亡之秋也然侍衛之臣不懈於內忠  
必之士亡身於外者蓋追先帝之遇欲報之於陛下也  
誠宜開張聖聽以光先帝遺德恢志士之氣不宜妄自  
菲薄引喻失義以塞忠諫之路也宮中府中俱爲一體  
陟罰臧否不宜異同若有作姦犯科及爲忠善者宜付  
有司論其刑賞以昭陛下平明之治不宜偏私使內外異  
法也侍中侍郎郭攸之費禕董允等此皆良實志慮忠  
純是以先帝簡拔以遺陛下愚以爲宮中之事事無大  
小悉以咨之然後施行必能裨補闕漏有所廣益也將  
軍向寵性行淑均曉暢軍事試用於昔日先帝稱之曰



能是以眾議舉寵為督愚以為營中之事悉以認之必能  
便行陣和穆優劣得所也親賢臣遠小人此先漢所以  
興隆也親小人遠賢士此後漢所以傾覆也先帝在時  
每與臣論此事未嘗不歎息痛恨於桓靈也侍中尚書  
長史參軍此悉貞亮死節之臣也願陛下親之信之則  
漢室之隆可計日而待也臣本布衣躬耕於南陽苟全  
性命於亂世不求聞達於諸侯先帝不以臣卑鄙猥自  
枉屈三顧臣於草廬之中諮臣以當世之事由是感激  
遂許先帝以驅馳後值傾覆受任於敗軍之際奉命於  
危難之間爾來二十有一年矣先帝知臣謹慎故臨崩  
寄臣以大事也受命以來夙夜憂歎恐託付不效以傷  
先帝之明故五月度瀘深入不毛今南方已定兵甲已  
足當帥將三軍北定中原庶竭駑鈍攘除姦凶興復漢

後出師表

室還于舊都此臣之所以報先帝而忠陛下之職分也  
至於斟酌規益進盡忠言則攸之禕允之任也願陛下  
託臣以討賊興復之效不效則治臣之罪以告先帝之  
靈若無興德之言則戮允等以革其慢陛下亦宜自謀  
以咨諏善道察納雅言深追先帝臣不勝受恩感激今  
當遠離臨表涕泣不知所云

先帝慮漢賊不兩立王業不偏安故託臣以討賊也以  
先帝之明量臣之才故知臣伐賊才弱敵疆也然不伐  
賊王業亦亡惟坐而待亡孰與伐之是故託臣而弗  
疑也臣受命之日寢不安席食不甘味思惟北征宜先  
入南故五月渡瀘深入不毛并日而食臣非不自惜也  
顧王業不可得偏安於蜀都故冒危難以奉先帝之遺



意而議者謂為非計今賊適疲於西又務於東兵法乘勞此進趨之時也謹陳其事如左高帝明並日月謀臣淵深然涉險被創危然後安今陛下未及高帝謀臣不如良平而欲以長策取勝坐定天下此臣之未解一也劉繇王朗各據州郡論安言計動引聖人群疑滿腹眾難塞曾今歲不戰明年不征使孫策坐大遂并江東此臣之未解二也曹操智計殊絕於人其用兵也髣髴孫吳然困於南陽險於烏巢危於祁連偏於黎陽幾敗北山殆死潼關然後偽定一時爾况臣才弱而欲以不危而定之此臣之未解三也曹操五攻昌霸不下四越巢湖不成任用李服而李服圖之委任夏侯而夏侯敗亡先帝每稱操為能猶有此失况臣駑下何能必勝此臣之未解四也自臣到漢中中間朞年耳然喪趙雲陽群

馬王閻芝丁立白壽劉郃鄧銅等及曲長屯將七十餘人突將無前實叟青羌散騎武騎一千餘人此皆數十年之內所糾合四方之精銳非一州之所有若復數年則損三分之二也當何以圖敵此臣之未解五也今民窮兵疲而事不可息事不可息則任與行勞費正等而不及蚤圖之欲以一州之地與賊持久此臣之未解六也夫難平者事也昔先帝敗軍於楚當此時曹操拊手謂天下已定然後先帝東連吳越西取巴蜀舉兵北征夏侯授首此操之失計而漢事將成也然後吳更違盟關羽毀敗秭歸蹉跌曹丕稱帝凡事如是難可逆見臣鞠躬盡瘁死而後已至於成敗利鈍非臣之明所能逆覩也

魏



求自試表

曹子建

臣植言臣聞士之生世入則事父出則事君事父尚於榮親事君貴於興國故慈父不能愛無益之子仁君不能畜無用之臣夫論德而授官者成功之君也量能而受爵者畢命之臣也故君無虛授臣無虛受虛授謂之謬舉虛受謂之戶祿詩之素餐所由作也昔二虢不辭兩國之任其德厚也曰奭不讓燕魯之封其功大也今臣蒙國重恩三世于今矣正值陛下升平之際沐浴聖澤潛潤德教可謂厚幸矣而位竊東藩爵在上列身被輕煖口厭百味目極華靡耳倦絲竹者爵重祿厚之所致也退念古之受爵祿者有異於此皆以功勤濟國輔主惠民今臣無德可述無功可紀若此終年無益國朝將桂風人彼己之譏是以上慙玄冕俯媿朱紱方今天

下一統九州晏如顧西尚有違命之蜀東有不臣之吳使邊境未得稅甲謀士未得高枕者誠欲混同宇內以致大和也故啓滅有扈而夏功昭成克商奄而周德著今陛下以聖明統世將欲卒文武之功繼成康之隆簡良授能以方叔邵虎之臣鎮衛四境為國爪牙者可謂當矣然而高鳥未挂於輕繳淵魚未懸於鈎餌者恐鈞射之術或未盡也昔取弁不俟光武亟擊張步言不以賊遺於君父也故車右伏劍於鳴鼓雍門刎首於齊境若此二子豈惡生而尚死哉誠忿其慢主而陵君也夫君之寵臣欲以除患興利臣之事君必殺身靜亂以功報主也昔賈誼弱冠求試屬國請係單于之頸而制其命終軍以妙年使越欲得長纓占其王羈致北闕此二臣豈好為夸主而耀世俗哉志或鬱結欲逞才力輸能於



明君也昔漢武為霍去病治第辭曰匈奴未滅臣無以  
家為固夫憂國忘家捐軀濟難忠臣之志也今臣居外  
非不厚也而寢不安席食不遑味者伏以二方未尅為  
念伏見先帝武臣宿兵年耆即世者有聞矣雖賢不乏  
世宿將舊卒由習戰也竊不自量志在效命庶立毛髮  
之切以報所受之恩若使陛下出不世之詔效臣雖刀  
之用使得西屬大將軍當一校之墜若東屬大司馬統  
偏師之任必乘危躡險騁舟奮驥突刃觸鋒為士卒先  
雖未能禽權馘亮庶將虜其雄率殲其醜類必效須臾  
之捷以滅終身之愧使名挂史筆事列朝榮雖身分蜀  
境首懸吳闕猶生之年也如微才不試沒世無聞徒榮  
其軀而豐其體生無益於事死無補於數虛荷上位而  
泰重祿禽息鳥視終於白首此徒圈牢之養物非臣之

所志也流聞東軍失備師徒小衄輟食棄餐奮袂攘袵  
撫劍東顧而心已馳於吳會矣臣昔從先武皇帝極  
赤岸東臨滄海西望王門北出玄塞伏見所以行車用  
兵之勢可謂神妙矣故兵者不可豫言臨難而制變者  
也志欲自效於明時立功於聖世每覽史籍觀古忠臣  
義士出一朝之命以殉國家之難身雖屠裂而功銘著  
於景鍾名稱垂於竹帛未嘗不拊心而歎息也臣聞明  
主使臣不廢有罪故奔北敗軍之將用秦魯以成其功  
絕纓盜馬之臣赦楚趙以濟其難臣竊感先帝早崩威  
王棄世臣獨何人以堪長久常恐先朝露填溝壑墳土  
未乾而身名並滅臣聞騏驎長鳴伯樂昭其能盧狗悲  
號韓國知其才是以效之齊楚之路以逞千里之任試  
之狡兔之捷以驗搏噬之用今臣志狗馬之微功竊自



惟度終無伯樂韓國之舉是以於邑而竊自痛音也夫  
臨博而企竦聞樂而竊抃者或有賞者而識道也昔毛  
遂趙之陪隸猶假錐囊之喻以寤主立切何况巍巍大  
魏多士之朝而無慷慨死難之臣乎夫自樹自媒者士  
女之醜行也于時求進者道家之明忌也而臣敢陳聞於  
陛下者誠與國分形同氣憂患共之者也冀以塵露之  
微補益山海螢燭末光增暉日月是以敢冒其醜而獻  
其忠知必為朝士所笑聖主不以人廢言伏惟陛下少  
垂神聽臣則幸矣

求通親親表

臣植言臣聞天稱其高者以無不覆地稱其廣者以無  
不載日月稱其明者以無不照江海稱其大者以無不  
容故孔子曰大哉堯之為君惟天為大惟堯則之夫天

德之於萬物可謂弘廣矣蓋堯之為教先親後疏自近  
及遠其傳曰克明俊德以親九族九族既睦平章百姓  
及周之文王亦崇厥化其詩曰刑于寡妻至于兄弟以  
御于家邦是以雍雍穆穆風人詠之昔周公弔管蔡之  
不咸庶封懿親以蕃屏王室傳曰周之宗盟異姓為後  
誠骨肉之恩爽而不離親親之義寔在敦固未有義而  
後其君仁而遺其親者也伏惟陛下咨帝唐欽明之德  
體文王翼翼之仁惠洽椒房恩昭九親群臣百寮蕃休  
遞上執政不廢於公朝下情得展於私室親理之路通  
慶弔之情展誠可謂怨已治人推惠施恩者矣至於臣  
者人道絕緒禁錮明時臣竊自傷也不敢乃望交氣類  
脩人事敘人倫近且婚媾不通兄弟永絕吉凶之間塞  
慶弔之禮廢恩紀之違甚於路人隔閼之異殊於胡越



今臣以一切之制未無朝覲之望至於注心皇極結情紫闥神明知之矣然天實爲之謂之何哉退省諸王常有戚戚具爾之心願陛下沛然垂詔使諸國慶問四節得展以敘骨肉之歡恩全怡怡之篤義妃妾之家膏沐之遺歲得再通齊義於貴宗等惠於百司如此則古人之所歎風雅之所詠復存於聖世矣臣伏自惟省無錐刀之用及觀陛下之所拔授若以臣爲異姓竊自料度不後於朝士矣若得辭遠游載武弁解朱組佩青紱駙馬奉車趣得一號安宅京室執鞭珥筆出從華蓋入侍輦轂承答聖問拾遺左右乃臣丹情之至願不離於夢想者也遠慕庶鳴君臣之宴中詠棠 匪他之誠下思伐木友生之義終懷蓼我罔極之哀每四節之會塊然獨處左右唯僕隸所對唯妻子高談無所與陳發義無所

與展未嘗不聞樂而拊心臨觴而歎息也臣伏以爲犬馬之誠不能動人譬人之誠不能動天崩城隕霜臣初信之以臣心沈徒虛語耳若葵藿之傾榮太陽雖不爲之迴光終向之者誠也臣竊自比葵藿若降天地之施垂三光之明者寔在陛下臣聞文子曰不爲福始不爲禍先今之否隔友于同憂而臣獨唱言者何也竊不願於聖代使有不蒙施之物必有慘毒之懷故栢舟有天只之怨谷風有棄子之歎伊尹恥其君不爲堯舜孟子曰不以舜之所以事堯事其君者不敬其君者也臣之愚蔽固非虞伊至於欲使陛下崇光被時雍之美宣緝熙章明之德者是臣悽悽之誠竊所獨守寔懷鶴立企佇之心敢復陳聞者冀陛下儻發天聰而垂神聽也



陳情表

李令伯

臣以險釁夙遭愍凶生孩六月慈父見背行年四歲舅奪母志祖母劉閔臣孤弱躬親撫養臣少多疾病九歲不行零丁孤苦至於成立既無叔伯終鮮兄弟門衰祚薄晚有兒息外無菴功強近之親內無應門五尺之童榮榮孑立形影相弔而劉夙嬰疾病常在牀蓐臣侍湯藥未嘗廢離逮奉聖朝沐浴清化前太守臣逵察臣孝廉後刺史臣榮舉臣秀才臣以供養無主辭不赴會詔書特下拜臣郎中尋蒙國恩除臣洗馬猥以微賤當侍東官非臣隕首所能上報臣具以表聞辭不就職詔書切峻責臣逋慢郡縣逼迫催臣上道州司臨門急於星火臣欲奉詔奔馳則以劉病日篤欲苟順私情則告誦不許臣之進退實為狼狽伏惟聖朝以孝治天下凡在

故老猶蒙矜育况臣孤苦特為尤甚且臣少事偽朝歷職郎署本圖宦達不矜名節今臣亡國賤俘至徵至陋過蒙拔擢豈敢盤桓有所希冀但以劉日薄西山氣息奄奄人命危淺朝不慮夕臣無祖母無以至今日祖母無臣無以終餘年母孫二人更相為命是以區區不能廢遠臣密今年四十有四祖母劉今年九十有六是臣盡節於陛下之日長報劉之日短也烏鳥私情願乞終養臣之辛苦非獨蜀之人士及二州牧伯所見明知皇天后土實所共鑑願陛下矜閔愚誠聽言微志庶劉僥倖卒保餘年臣生當殞首死當結草臣不勝怖懼之情謹拜表以聞

讓開府表

羊叔子

名祐太山人征南大將軍開府辟召議同司

臣祐言臣昨出伏聞恩詔拔臣使同台司臣自出身以



來適十數年受任外內每極顯重之地常以智力不可  
疆進恩寵不可久謬夙夜戰慄以榮為憂臣聞古人之  
言德未為眾所服而受高爵則使才臣不進功未為眾  
所歸而荷厚祿則使勞臣不勸今臣身託外戚事遭運  
會誠在過寵不患見遺而猥超然降發中之詔加非次  
之榮臣有何功可以堪之何心可以安之以身誤陛下  
辱高位傾覆亦尋而至願復守先人弊廬豈可得哉違  
命誠忤天威曲從即復若此蓋聞古人申於見知大臣  
之節不可則止臣雖小人敢緣所蒙急存斯義今天下  
自服化已來方漸八年雖側席求賢不遺幽賤然臣等  
不能推有德進有功使聖聽知勝臣者多而未達者不  
少假令有遺德於版築之下有隱才於屠釣之間而令  
朝議用臣不以為非臣處之不以為愧所失豈不大哉且

臣忝竊雖久未若今日兼文武之極寵等宰輔之高位  
也臣所見雖狹據光祿大夫李喜秉節高亮正身在朝  
光祿大夫魯芝繫身寡欲和而不同光祿大夫李胤莅  
政弘簡在公正色皆服事華髮以禮始終雖歷內外之  
寵不異寒賤之家而猶未蒙此選臣更越之何以塞天  
下之望少益日月是以誓心守節無苟進之志今道路  
未通方隅多事乞留前恩使臣得速還屯不爾留連必  
於外虞有闕臣不勝憂懼謹觸冒拜表惟陛下察匹夫  
之志不可以奪

勸進表

劉越石

建興五年三月癸未朔十八日辛丑使持節散騎常侍  
都督河北并冀幽三州諸軍事領護軍匈奴中郎將司  
空并州刺史廣武侯臣琨使持節侍中都督冀州諸軍



事撫軍大將軍冀州刺史左賢王渤海公臣匹磾頓首  
死罪上書臣琨臣匹磾頓首頓首死罪死罪臣聞天生  
蒸民樹之以君所以對越天地司牧黎元聖帝明王鑑  
其若此知天地不可以乏饗故屈其身以奉之知黎元  
不可以無主故不得已而臨之社稷時難則戚藩定其  
傾郊廟或替則宗拓纂其祀所以弘振遐風式固萬世  
三五以降靡不由之臣琨臣匹磾頓首頓首死罪死罪  
伏惟高祖宣皇帝肇基景命世祖武皇帝遂造區夏三  
葉重光四聖繼軌惠澤侔於有虞卜年過於周氏自元  
康以來艱禍繁興永嘉之際氛厲彌昏宸極失御登遐  
醜裔國家之危有若綴旒賴先后之德宗廟之靈皇帝  
嗣建舊物克甄誕授欽明服膺聰哲王質幼彰金聲夙  
振家宰攝其綱百辟輔其治四海想中興之美群生懷

來蘇之望不圖天不悔禍大災存臻國未忘難寇害尋  
興逆胡劉曜縱逸西都敢肆犬羊陵虐天邑臣等奉表  
使還仍承西朝以去年十一月不守主上幽劫復沈虜  
廷神器流離再辱荒逆臣每覽史籍觀之前載厄運之  
極古今未有苟在食土之毛含氣之類莫不叩心絕氣  
行號巷哭況臣等荷寵三世位廁鼎司承問震惶精爽  
飛越且悲且惋五情無主舉哀朔垂上下泣血臣琨臣  
匹磾頓首頓首死罪死罪臣聞昏明迭用否泰相濟天  
命未改歷數有歸或多難以固邦國或殷憂以啓聖明  
是以齊有無知之禍而小白為五伯之長晉有驪姬之  
難而重耳主諸侯之盟社稷靡安必將有以扶其危黔  
首幾絕必將有以繼其緒伏惟陛下之德通於神明聖  
姿合於兩儀應命世之期紹千載之運夫符瑞之表天



人有徵中興之兆圖讖垂典自京畿隕喪九服崩離天下  
下囂然無所歸懷雖有夏之遘夷羿宗姬之離犬戎蔑以過之  
陛下撫寧江左奄有舊吳柔服以德伐叛以刑抗明威以攝不類  
仗大順以肅宇內純化既敷則率土宅心義風既暢則遐方企踵  
百揆時序於上四門穆穆於下昔少康之隆夏訓以為美談宣王  
之興周詩以為休詠况茂勲格于皇天清輝光于四海蒼生顛然莫不欣  
戴聲教所加願為臣妾者哉且宣王之胤惟有陛下億兆攸歸曾無與  
二天祚大晉必將有主主晉祀者非陛下而誰是以邇無異言遠無異  
望謳歌者無不吟詠徽猷獄訟者無不思于聖德天地之際既交華裔  
之情允洽一角之獸連理之木以為休徵者蓋有百數冠帶之倫要荒  
之衆不謀而同辭者動以萬計是以臣等敢考

天地之心因函夏之趣味死以上尊號願陛下存舜禹至公之情狹巢由抗矯之節以社稷為務不以小行為先以黔首為憂不以克讓為事上以慰宗廟乃顧之懷下以釋溥天傾首之望則所謂生繁華於枯美育豐肌於朽骨神人獲安無不幸甚臣琨臣匹磾頓首頓首死罪死罪臣聞尊位不可久虛萬機不可久曠虛之一日則尊位以殆曠之浹辰則萬機以亂方今鍾百王之季當陽九之會狡寇窺窬伺國瑕隙齊人波蕩無所繫心安可以廢而不恤哉陛下雖欲逡巡其若宗廟何其若百姓何昔惠公虜秦晉國震駭呂卻之謀欲立子圉外以絕敵人之志內以固闔境之情故曰喪君有君群臣輯穆好我者勸惡我者懼前事之不忘後代之元龜也陛下明並日月無幽不燭深謀遠慮出自曾懷不勝



犬馬憂國之情遲覩人神開泰之路是以陳其乃誠布  
之執事臣等各忝守方任職在遐外不得陪列闕庭共  
觀盛禮踊躍之懷南望圖極謹上臣琨謹遣兼左長史  
右司馬臣溫嶠主簿臣辟閭訓臣礪遣散騎常侍征虜  
將軍清河太守領右長史高平亭侯臣榮劭輕車將軍  
關內侯臣郭穆奉表臣琨臣匹礪等頓首頓首死罪死  
罪

謝平原內史表

陸士衡

陪臣陸機言今月九日魏郡太守遣兼承張含贊板詔  
書印綬假臣為平原內史拜受祗竦不知所裁臣本出  
自敵國世無先臣豐功之効才非立園耿介之秀皇澤  
廣被惠濟無遠擢自群萃累蒙榮進入朝九載歷官有  
六身登三閣官成兩宮服冕乘軒仰齒貴游振景拔迹

顧邈同列施重山岳義足灰沒遭國顛沛無節可紀雖  
蒙曠盪臣獨何顏俛首頓膝憂愧若厲而橫為故齊王  
冏所見枉陷誣臣與眾人共作禪文幽隱囹圄當為詆  
始臣之微誠不負天地倉卒之際慮有逼迫乃與弟雲  
及散騎侍郎袁瑜中書侍郎馮熊尚書右丞崔基廷尉  
正顧榮汝陰太守曹武思所以獲免陰蒙避迴崎嶇自  
列片言隻字不關其閒事蹤筆迹皆可推校而一朝翻  
然更以為罪叢爾之生尚不足吝區區本懷實有可忘  
畏逼天威即罪惟謹鉗口結舌不敢上訴所天莫大之  
釁日經聖聽肝血之誠終不一聞所以臨難慷慨而不  
能不恨恨者唯此而已重蒙陛下愷悌之宥迴霜收電  
使不隕越復得扶老攜幼生出獄戶懷金拖紫退就散  
輩感恩惟咎五情震悼跼天踳地若無所容不悟日月



之明遂垂曲照雲雨之澤播及朽瘁忘臣弱才身無足  
采哀臣零落罪有可察苟削丹書得夷平民則塵洗天  
波謗絕衆口臣之始望尚未至是猥辱大命顯授符虎  
使春枯之條更與秋蘭垂芳陸沈之羽復與翔鴻撫翼  
雖安國免徒起紆青組張敞亡命坐致宋軒方臣所荷  
未足爲泰豈臣蒙垢含咨所宜忝竊非臣毀宗夷族所  
能止報喜懼參并悲慙哽結拘守常憲當使道之官不  
得束身奔走稽顙城闕瞻係天衢馳心輦轂臣不勝屏  
營延仰謹拜表以聞

讓中書令表

庾元規

臣亮言臣凡庸固陋少無檢操昔以中州多故舊邦喪  
亂隨侍先臣遠庇有道爰客逃難求食而已不悟邀時  
之福遭遇嘉運先帝龍興垂異常之顧既眷同國士又

申之婚姻遂階親寵累忝非服弱冠濯纓沐浴玄風頻  
繁省闈出領六軍十餘年閒位超先達無勞被遇無與  
臣比小人祿薄福過災生止足之分臣所宜守而偷榮  
昧進日爾一日謗譏旣集上塵聖朝始欲自聞而先帝  
登遐區區微誠竟未上達陛下踐祚聖政維新宰輔賢  
明庶寮咸允康哉之歌實在至公而國恩不已復以臣  
領中書則示天下以私矣何者臣於陛下后之兄也姻  
婭之嫌實與骨肉中表不同雖太上至公聖德無私然  
世之喪道有自來矣悠悠六合皆私其姻者也有人皆有  
私則謂天下無公矣是以前後二漢咸以抑后黨安進  
婚族危向使西京七族東京六姓皆非姻黨各以平進  
縱不悉全決不盡敗今之盡敗更由姻昵臣歷觀庶姓  
在也無黨於朝無援於時植根之本輕也薄也苟無大



瑕猶或見容至於外戚憑託天地勢連四時根援扶疎重矣大矣而財居權寵四海側目事有不允罪不容誅身既招殃國為之弊其故何耶直由婚媾之私群情之所不能免故率其所嫌而嫌之於國是以疏附則信姻進則疑疑積於百姓之心則禍成重闢之內矣此皆往代成鑑可為寒心者也夫萬物之所不通聖賢因而不奪冒親以求一才之用未若防嫌以明公道今以臣之才兼如此之嫌而使內處心膂外揔兵權以此求治未之聞也以此招禍可立待也雖陛下二相明其愚款朝士百寮頗識其情天下之人何可門到戶說使皆坦然耶夫富貴寵榮臣所不能忘也刑罰貧賤臣所不能甘也今恭命則愈違命則苦臣雖不達何事背時違上自貽惡責哉仰覽殷鑑量已知敝身不足惜為國取悔是

以慳慳屢陳丹款而微誠淺薄未垂察諒憂惶屏營不知所厝以臣今地不可以進明矣且違命已久臣之罪又積矣歸骸私門以待刑書願陛下垂天地之鑑察臣之愚則雖死之日猶生之年矣

為吳令謝詢求為諸孫置守塚人表 張士然

名峻吳國人太子庶子

臣聞成湯革夏而封祀武王入殷而建宋春秋征伐則晉脩虞祀燕祭齊廟夫一國為一人興先賢為後愚廢誠仁聖所哀悼而不忍也故三王敦繼絕之德春秋重伐叛之義昔漢高受命追存六國凡諸絕祚一時並祀親與項羽對爭存亡逮羽之死臨哭其喪將以位嘗侔尊力嘗均勢雖功奪其成而恩與其敗且暴興疾顛禮之若舊殘戮之尸乃以公葬若使羽位承前緒世有拓



王一朝力屈全身從命則楚廟不墮有後可冀伏惟大  
晉應天順民武成止戈西戎有即序之人京邑關吳蜀  
之館與滅加乎萬國繼絕接于百世雖三五弘道商周  
稱仁洋洋之美未足以喻是以孫氏雖家失吳祚而族  
蒙晉榮子弟量才比肩進取懷金溪服佩青千里當時  
受恩多有過望臣聞春雨潤木自葉流根鷓鴣恤切愛  
子乃室故天稱圖極之恩聖有綢繆之惠追惟吳僞武  
烈皇帝遭漢室之弱值亂臣之彊首唱義兵先眾犯難  
破董卓於陽人濟神器於甄井威震群狡名顯往朝桓  
王才武弱冠承業招百越之士奮鷹揚之勢西赴許都  
將迎幼主雖元勳未終然至忠已著夫家積義勇之基  
世傳扶危之業進為徇漢之臣退為開吳之主而蒸嘗  
絕於三葉園陵殘於新采臣竊悼之伏見吳平之初明  
詔追錄先賢欲封其墓愚謂二君並宜應書故舉勞則  
力輸先代論德則惠存江南正刑則罪非晉寇從坐則  
異世已輕若列先賢之數蒙詔書之恩裁加表異以寵  
亡靈則人望克厭誰不曰宜二君私奴多在墓側今為  
平民乞差五人蠲其徭役使四時修護頽毀掃除瑩壠  
永以為常

薦譙元彥表

桓元子

名溫譙國  
人大司馬

臣聞太朴既虧則高尚之標顯道喪時昏則忠貞之義  
彰故有洗耳投淵以振玄澗之風亦有秉心矯跡以敦  
在三之節是故上代之君莫不崇重斯軌所以篤俗訓  
民靜一流競伏惟大晉應符御世運無常通時有屯蹇  
神州丘墟三方圯裂兔置絕響於中林白駒無聞於空  
谷斯有識之所悼心大雅之所歎息者也陛下聖德嗣



興方恢天緒臣昔奉役有事西土鯨鯢既懸思宣大化  
訪諸故老搜揚潛逸庶武羅於羿浞之墟想王蠋於亡  
齊之境竊聞巴西譙秀植操貞固抱德肥遯揚清渭波  
于時皇極遘道消之會群黎蹈顛沛之艱中華有顧瞻  
之哀幽谷無遷喬之望凶命屢招奸威仍逼身寄虎吻  
危同朝露而能抗節玉立誓不降辱杜門絕跡不面偽  
庭進免龔勝亡身之禍退無薛方詭對之譏雖園綺之  
棲商洛管寧之默遼海方之於秀殆無以過于今西土  
以爲羨談夫旌德禮賢化道之所先崇表殊節聖喆之  
上務方今六合未康豺豕當路遺黎偷薄義聲不聞益  
宜振起道義之徒以敦流遯之敝若秀蒙蒲帛之徵足  
以鎮靜頽風勸訓囂俗幽遐仰流九服知化矣

解尚書表

殷仲文

桓溫

臣聞洪波振壑川無恬鱗驚颺拂野林無靜柯何者勢  
弱則受制於巨力質微則莫以自保於理雖可得而言  
於臣寔所敢喻昔桓玄之世誠復驅迫者衆至於愚臣  
罪實深矣進不能見危授命忘身殉國退不能辭粟首  
陽拂衣高謝遂乃宴安昏寵叨昧僞封錫文篡事曾無  
獨固名義以之俱淪情節自茲兼撓宜其極法以判忠  
邪鎮軍臣裕匡復社稷大弘善貸佇一戮於微命申三  
驅於大信既惠之以首領復引之以繫維于時皇輿否  
隔天人未泰用忘進退唯力是視是以僂俛從事自同  
全人今宸極反正惟新告始憲章既明品物思舊臣亦  
胡顏之厚可以顯居榮次乞解所職待罪私門違謝闕  
庭乃心愧戀謹拜表以聞

宋



為宋公至洛陽謁五陵表

傅季友

臣裕言近振旅河湄揚旂西邁將屆舊京威懷司雍河  
流逆疾道阻且長加以伊洛榛蕪津塗久廢伐木通徑  
淹引時月始以今月十二日次故洛水浮橋山川無改  
城闕為墟宮廟隳頓鍾簏空列觀宇之餘鞠為禾黍塵  
里蕭條雞犬罕音感舊永懷痛心在目以其月十五日  
奉謁五陵墳坐幽淪百年荒翳天衢開泰情禮獲申故  
老掩涕三軍悽感瞻拜之日憤慨交集行河南太守毛  
脩之等既開翦荆棘繕脩毀垣職司既備番衛如舊  
伏惟聖懷遠慕兼慰不勝下情謹遣傳詔殿中中郎臣  
某奉表以聞

為宋公求加贈劉前軍表

臣聞崇賢旌善王化所先念功勤勞義深追遠故司勳  
秉策在勤必記德之休明沒而彌著故尚書左僕射前  
軍將軍臣劉穆之爰自布衣協佐義始內竭謀猷外勤  
庶政密勿軍國心力俱盡及登庸朝右尹司京畿敷讚  
百揆翼新大猷頃戎車遠役居中作捍撫寧之勳實治  
朝野識量局致棟幹之器也方宣讚盛化緝隆聖世志  
績未究遠邇悼心皇恩褒述班同三事榮哀既備寵靈  
已泰臣伏思尋自義熙草創艱患未弭外虞既殷內難  
亦存時屯世故靡有寧歲臣以寡劣負荷國重實賴穆  
之匡翼之勲豈唯讜言嘉謀溢于民聽若乃忠規密謨  
潛慮帷幕造膝詭辭莫見其際事隔於皇朝功隱於視  
聽者不可勝記所以陳力一紀遂克有成出征入輔幸  
不辱命微夫人之左右未有寧濟其事者履謙居寡守  
之彌固每議及封爵輒深自抑絕所以勲高當年而茅



土帟及撫事求念胡寧可昧謂宜加贈正司追甄土宇  
俾忠貞之烈不泯於身後大賚所及永秩於善人臣契  
閣屯夷旋觀終始金蘭之分義深情感是以獻其乃懷  
布之朝聽所啓上合請付外詳議

齊梁

為齊明皇帝作相讓宣城郡公第一表

任彦升

臣鸞言被臺司召以臣為侍中中書監驃騎大將軍開  
府儀同三司揚州刺史錄尚書事封宣城郡開國公食  
邑三千戶加兵五千人臣本庸才智力淺短太祖高皇  
帝篤猶子之愛降家人之慈世祖武皇帝情等布衣寄  
深同氣武皇大漸實奉話言雖自見之明庸近所蔽愚  
夫一至偏識量已實不忍自固於綴衣之辰拒違於玉

几之側遂荷顧託導揚末命雖嗣君棄常獲罪宣德王  
室不造職臣之由何者親則東牟任惟博陸徒懷子孟  
社稷之對何救昌邑爭臣之譏四海之議於何逃責且  
陵十未乾訓誓在耳家國之事至於斯非臣之尤誰  
任其咎將何以肅拜高寢虔奉武園悼心失圖泣血待  
日寧容復徵榮於家恥宴安於國危驃騎上將之元勳  
神州儀刑之列岳尚書古稱司會中書實管王言且虛  
飾寵章委成禦侮臣知不愜物誰謂宜但命輕鴻毛責  
重山岳存沒同歸致譽一貫辭一官不減身累增一職  
已躡朝經使當自同體國不為飾讓至於功均一匡賞  
同千室光宅近甸奄有全邦隕越為期不敢聞命亦願  
曲留降鑑即垂順許鉅平之懇誠彌固永昌之丹慊獲  
申乃知君臣之道綽有餘裕苟曰易昭敢守難奪故可



庶心弘議酌已親物者矣不勝荷懼屏營之誠謹附某  
官某甲奉表以聞

爲范尚書讓吏部封侯第一表

臣雲言被尚書召以臣爲散騎常侍吏部尚書封霄城  
縣開國侯食邑千戶奉命震驚心顏無措臣雲臣素門  
凡流輪翮無取進謝中庸退慙狂狷固嘗鑽厲求學而  
一經不治篆刻爲文而三冬靡就負書燕魏空殫菽粟  
躡屩齊楚徒知貧賤旣而分虎出守以囊被見嗤持斧  
作牧以意以興謗赭衣爲虜見獄吏之尊除名爲民知  
并曰之逸百年上壽旣曰徒然如其誠說亦以過年亂  
離斯瘼欲以安歸閉門荒郊再離寒暑兼以東臯數畝  
控帶朝夕關外一區悵望鍾阜雖室無趙女而門多好  
事祿微賜金而歡同娛老折芟燔枯此焉自足陛下應

期萬世接統千祀三千景附八百不謀臣釁等離心切  
慙同德泥首在顏輿棺未毀締構草昧敢叨天功獄訟  
謳歌示同民志而隆器大名一朝惣集顧已及躬何以  
臻此政當以接閉白水列宅舊豐忘捨講之尤存諸公  
之費俯拾青紫豈待明經臣雲夫銓衡之重關諸隆替  
遠惟則括在帝猶難漢魏以降達識繼軌雅俗所歸唯  
稱許郭拔十得五尚曰比肩其餘得失未聞偶察童幼  
天機暫發顧無足算在魏則毛玠公方居晉則山濤識  
量以臣况之一何遼落齊李陵遲官方淆亂鴻都不綱  
西園成市金章有盈筭之談華貂深不足之歎草創惟  
始義存改作恭已南面責成斯在豈宜妄加寵私以乏  
王事附蟬之飾空成寵章求之公私授受交失近世侯  
者功緒參差或足食關中或成軍河內或制勝帷幄或



門人加親或與時抑揚或隱若敵國或策定禁中或功  
成野戰或盛德如卓茂或師道如桓榮或四姓侍祀已  
無足紀五侯外戚且非舊章而臣之所附唯在恩澤既  
義異疇庸實榮乖儒者雖小人貪幸豈獨無心臣本自  
諸生家承素業門無富貴易農而仕乃祖玄平道風秀  
世爰在中興儀刑多士位裁元凱任止牧伯高祖少連  
夙秉高尚所富者義所乏者時薄宦東朝謝病下邑先  
志不忘愚臣是庶且去歲冬初國學之老博士耳今茲  
首夏將亞冢司雖千秋之一日九遷荀爽之十旬遠至  
方之微臣未為速達臣雖無識唯利是視至於虧名損  
實為國為身知其不可不敢妄冒陛下不棄管蒯愛同  
絲麻儻平生之言猶在聽覽宿心素志無復貳辭矜臣  
所乞特廻寵命則彝章載穆微物知免臣今在假不容  
詣省不任荷懼之至謹奉表以聞

為蕭揚州作薦士表

臣王言臣聞求賢暫勞垂拱永逸方之䟽壤取類導川  
伏惟陛下道隱旒纒信充符璽六飛同塵五讓高世白  
駒空谷振鷺在庭猶懼隱鱗卜祝藏器屠保物色關下  
委裘河上非取製於一狐諒求味於兼采而五聲倦響  
九工是詢寢議廟堂借聽輿皂臣位任隆重義兼家邦  
實欲使名實不違微倖路絕勢門上品猶當格以清談  
英俊下僚不可限以位貌竊見秘書丞琅邪臣王暕年  
二十一守思晦七葉重光海內冠冕神清氣茂允迪中  
和叔寶理遣之談彥輔名教之樂故以暉映先達領袖  
後進居無塵雜家有賜書辭賦清新屬言玄遠室邇人  
曠物踈道親養素立園台階虛位庠序公朝萬夫傾望



豈徒苟令可想李公不亡而已哉前晉安郡候官令東海王僧孺年三十五理尚棲約思致恬敏既筆耕為養亦傭書成學至乃集螢映雪編蒲緝柳先言往行人物雅俗甘泉遺儀南宮故事畫地成圖抵掌可述豈直黷鼠有必對之辯竹書無落簡之謬矚坐鎮雅俗弘益已多僧孺訪對不休質疑斯在並東序之祕寶瑚璉之茂器誠言以人廢而才實世資臨表悚戰猶懼未允不任下情

為褚諮議羨讓代兄襲封表

臣羨言昨被司徒符仰稱詔日許臣兄賁所請以臣襲封南康郡公臣門籍勲蔭允錫土宇臣賁世載承家允膺長德而深鑑止足脫屣千乘遂乃遠謬推恩近萃庸薄能以國讓弘義有歸匹夫難奪守以勿貳昔武始

迫家臣之策陵陽感鮑生之言張以誠請丁為理屈且先臣以大宗絕緒命臣出纂傍統稟承在昔理絕終天未惟情事觸日崩隕若使賁高王陵之風臣忘子臧之節是廢德舉豈曰能賢陛下察其丹款特賜停絕不然投身草澤苟遂愚誠爾不任丹慊之至謹詣闕拜表以聞臣誠惶誠恐

為范始興作求立太宰碑表

臣雲言原夫存樹風猷沒著徽烈既絕故老之口必資不刊之書而藏諸名山則陵谷還貿府之延閣則青編落簡然則配天之迹存乎泗水之上素王之道紀於沂川之側由是崇師之義擬迹於西河尊主之情致之於堯禹故精廬二啓必窮鐫勒之盛君長一城亦盡刊刻之美况乎甄陶周召孕育伊顏故太宰竟陵文宣王臣



某與存與亡則義形社稷嚴天配帝則周公其人體國  
端朝出藩入守進思必告之道退無苟利之專五教以  
倫有揆時序若夫一言一行盛德之風琴書藝業述作  
之茂道非兼濟事止樂善亦無得而稱焉人之云亡忽  
移歲序鷓鴣東徙松檟成行六府臣僚三藩士女人蓄  
油素家懷鉛筆瞻彼景山徒然望慕昔晉氏初禁立碑  
魏舒之亡亦從班列而阮略既泯故首身嚴科為之者  
竟免刑戮置之者反蒙嘉歎至於道被如仁功叅微管  
本宜在常均之外故太宰淵丞相疑親賢並軌即為成  
規乞依二公前例賜許刊立寧容使長想九原蘇圖  
識其禁駐蹕長陵輜軒不知所適臣里閭孤賤才無可  
甄值齊網之弘弛賓客之禁策名委質忽焉二紀慮先  
犬馬厚恩不答而弊帷毀蓋未辱螻蟻珠襦玉匣虞飾  
幽泉陛下弘獎名教不隔微物使臣得駿奔南浦長號  
北陵既曲逢前施實仰覲後澤儻驗杜預山頂之言庶  
存馬駿必拜之感臨表悲懼言不自宣

唐

諫重討高麗表

房玄齡

臣聞兵惡不戢武貴止戈當今聖化所覃無遠不暨上  
古所不臣者陛下皆能臣之所不制者皆能制之詳觀  
古今為中國患害無過突厥遂能坐運神策不下殿堂  
大小可汗相次束手分典禁衛執戟行閒其後延陀鷓  
張尋就夷滅鐵勒慕義請置州縣沙漠已北萬里無塵  
至如高昌叛渙於流沙吐渾首鼠於積石偏師薄伐俱  
從平蕩高麗歷代逋誅莫能討擊陛下責其逆亂殺主  
虐民親總六軍問罪遼碣未經旬日即拔遼東前後虜



獲數十萬計分配諸州無處不滿雪往代之宿恥掩靖  
陵之枯骨比功校德萬倍前王此聖主所自知微臣安  
敢備說且陛下仁風被于率土孝德彰於配天覩夷狄  
之將亡則指期數歲授將帥之節度則決機萬里屈指  
而候驛視景而望書符應若神筭無遺策擢將於行伍  
之中取士於凡庸之末遠夷單使一見不忘小臣之名  
未嘗再問箭穿七札弓貫六鈞加以留情墳典屬意篇  
什筆邁鍾張詞窮賈馬文鋒旣振則宮徵自諧輕翰暫  
飛則花葩競發撫萬姓以慈遇群臣以禮褒秋毫之善  
解吞舟之網逆耳之諫必聽膚受之愬斯絕好生之德  
禁障塞於江湖惡殺之仁息鼓刀於屠肆鳧鶴荷稻梁  
之惠犬馬蒙帷蓋之恩降尊吮思摩之瘡登堂臨魏徵  
之柩哭戰亡之卒則哀動六軍負填道之薪則情感天

地重黔黎之大命特盡心於庶獄臣心識昏憤豈足論  
聖功之深遠談天德之高大哉陛下兼眾美而有之靡  
不備具微臣深為陛下惜之重之愛之實之周易曰知  
進而不知退知存而不知亡知得而不知喪又曰知進  
退存亡而不失其正者其惟聖人乎由此言之進有退  
之義存有亡之機得有喪之理老臣所以為陛下惜之  
者蓋謂此也老子曰知足不辱知止不殆臣謂陛下威  
名功德亦可足矣拓地開疆亦可止矣彼高麗者邊夷  
賸類不足待以仁義不可責以常理古來以魚鱉畜之  
宜從闊略必欲絕其種類深恐獸窮則搏且陛下每  
決死囚必令三覆五奏進素食停音樂者蓋以人命所  
重感動聖慈也况今兵士之徒無一罪戾無故驅之於  
戰陣之間委之於鋒刃之下使肝腦塗地魂魄無歸令



其老父孤兒寡妻慈母望鞋單而掩泣抱枯骨而摧心  
足變動陰陽感傷和氣實天下之冤痛也且兵凶器戰  
危事不得已而用之向使高麗違失臣節而陛下誅之  
可也侵擾百姓而陛下滅之可也又長能為中國患而  
陛下除之可也有一於此雖日殺萬夫不足為媿今無  
此三條坐煩中國內為舊主雪怨外為新羅報讎豈非  
所存者小所損者大願陛下遵皇祖老子止足之誠以  
保萬代巍巍之名發霈然之恩降寬大之詔順陽春以  
布澤許高麗以自新焚凌波之船罷應募之眾自然華  
夷慶賴遠肅邇安臣老病三公朝夕入地所恨竟無塵  
露微增海岳謹罄殘魂餘息豫代結草之誠儻蒙錄此  
哀鳴即臣死骨不朽也

進渾儀表

張道濟

臣聞迎日授時莫先於曆象先天成務必歸於製作伏  
惟開元神武皇帝陛下建中立極緯武經文至德難  
名神功莫測於是定曆成歲立象考天紹唐堯欽若之  
典遵虞舜璿王之義上皇能事於斯備矣臣書院先奉  
敕造游儀以測上曜盈縮去年六月造畢進奏又奉恩  
旨更立渾儀臣等准敕令左衛率府長史梁令瓚檢校  
創造於是博考傳記舊有張衡陸績王蕃錢樂之等並  
造斯器雖渾體有象而不能運行事非經久旋亦毀廢  
臣今按據典故鑄銅為儀圓以象天使得俯察上具列  
宿赤道周天度數注水激輪令其自運一日一夜天轉  
一周又別立一周輪絡在天外綴以日月令得運行每  
轉一匝日行一度月行十二度十九分度之七凡二十  
九轉有餘而日月會三百六十五轉而行匝仍置木櫃



以爲地平令儀半在地上半在地下晦明朔望不差毫  
髮又立二木人於地平之上前置鍾鼓以候辰刻每一  
刻則自然擊鼓每一辰則自然撞鍾皆於櫃中各施輪  
軸鉤鍵交錯關鎖相持轉運雖周而遲速各異周而復  
始循環不息陰陽不能逃其數度分不能隱其時究天  
地之幹運極乾坤之變化斯皆上稟聖謨旁獲神助臣  
等愚思昔所不能及望錄付史館宣示百寮使知告成  
之功迥超前古無任勤懇之至謹隨表上進以聞

爲東平薛太守進王氏瑞詩表 高達夫

臣某言符瑞之興實由王政歌詩之作本自國風伏見  
范陽盧某母瑯琊王氏性合希夷體於靜默精微道本  
馳騫玄關旁通天地之心預紀休徵之盛去景龍二載  
撰天寶迴紋詩凡八百一十二字循環有數若寒暑之

遞遷應變無窮謂陰陽之莫測誠其子曰吾沒之後爾  
密記之當逢大道之朝必遇非常之主則真圖之製便  
可上言君親之義不違犬馬之誠斯在臣早識其子嘗  
與臣言星霜屢移書奏仍闕以歲月滋久旨趣幽微沈  
吟耳目之前倏忽禎祥之後伏惟皇帝陛下乘道御極  
乃聖興化參日月之並明體乾坤而同德梯航萬里爭  
飲淳和之風臣妾四夷盡歸仁壽之域今陛下務於道  
道可盡乎法於天天寶長久是知與道齊運比天同休  
無疆之徵乃在茲矣則天授之美其可替乎章句粲然  
所謂沒而不朽者也臣某誠惶誠恐頓首頓首昔漢幸  
甘泉且昧神君之語周窮轍迹徒稱王母之謠豈若迥  
出名言高懸響像應皇王之丕命運宮商於景福且夫  
靈芝嘉禾以草木之瑞尚有頌聲方之真圖彼未爲得



特望編之史策列在樂章則陛下先於天而聽於人也  
臣才術淺劣謬忝藩條曾微消塵以答萬一恒馳北極  
每切子牟之戀遙奉南山願效封人之祝

為敬暉等論武氏宜削去王爵表 岑仲華

臣暉等言臣聞神器者天下之至公必歸乎有德皇極  
者域中之大寶必順乎天命歷考前古詳觀帝業皆不  
並興莫不更王故三皇氏沒而五帝氏興夏殷氏衰而  
周漢氏作何則帝王之曆數必應乎五行水盛則火衰  
木衰則金盛天地之運也必合乎四時春往則夏來暑  
退則寒集則知五行之數帝王不可違違之則宗社不  
安生人不理四時之序天地不能變變之則霜露不均水  
旱交錯自有隋失御海內崩離天曆之重歸于唐室萬  
方樂業荷撥亂之功三聖重光布生成之德可謂有功

於四海有德於蒸人自弘道遏密生靈降禍百姓哀號  
如喪考妣則天皇帝臨御帝圖明目達聰躬親庶績則  
有讒邪凶孽誣惑獻德構害宗枝誅夷殆盡英藩賢戚  
百不存一餘類在者投竄荒裔酷虐人神感傷天地忠  
臣義士實所痛心自天授之際僭稱改革武家子姪咸  
樹封建十餘年間實亦樂極時唐室藩屏豈得並封故  
知事有昇降時使然也今則天皇帝厭倦萬務神器大  
寶重歸陛下百姓謳歌欣復唐業上至卿士下及蒼生  
黃髮之倫童兒之輩莫不歡欣舞抃如見父母豈不以  
唐家恩德感幽祇之心陛下仁明順天下之望今皇業  
重構聖祚中興神祇之道有助於先德矣黎人之誠無  
負於陛下矣臣又聞之業不兩盛事不兩大故天無二  
日土無二王前聖之格言先哲之明誠自皇明反正天



命惟新武家諸王封建依舊生者既加茅土死者仍追  
賦邑萬姓失望卿士寒心何則開闢已來罕有斯理帝  
王之道實無此法陛下縱欲開恩以行私惠豈可違五  
行運曆乎乖四時寒暑乎又海內衆情朝廷竊議謂武  
氏諸王身計亦危適將有損何處之未得其所居之實  
恐不安陛下雖欲寵之翻乃陷之不遵古典故也且唐  
曆有歸周命已去爵重則難保祿薄則易全又則天皇  
帝親政之時武氏諸王亦分外職今並居京輦不降舊  
封天下之心竊將不可陛下縱欲敦崇外戚曲流恩貸柰  
宗廟社稷之計何奈卿士黎人之議何伏願陛下爲社  
稷之遠圖割私情之小愛內崇經邦之要外順遐邇之  
心豈不固宗廟之本允人靈之願則陛下巍巍之業貫  
三光而洞九泉親親之義上有倫而下有序臣等特承

榮寵思竭丹衷既爲唐臣實爲唐計伏乞聖慈俯垂矜  
納焉

請抑損外戚權寵并乞佐外郡表 武平一

臣平一言緣修起居注太史監每季有牒臣伏見從去  
歲已來屢有災異熒惑入羽林太白再經天太陽虧月  
犯大角臣伏按舊史文志咸非休吉之感或爲咎徵之  
兆臣聞災不妄生變不虛設象見於上人應於下其理  
昭彰有如影響陛下嗣膺鴻業寅畏上玄故皇天不言  
以災眚譴誡詩曰敬天之怒不敢驅馳又曰維此文王  
小心翼翼昭事上帝聿懷多福臣伏見陛下孝愛因心  
敦崇戚族澤濡后氏恩合外家位以慈周榮因惠假臣  
當宗親階越三等家有數侯既忝國姻復叨枝屬朱輪  
華轂金榜瑤簪過東漢之梁鄧邁西京之許史光輝焜



煌古今所絕誠陛下睦於親寵降於慈貸臣未息機謀  
深近竄黷恩彌崇而議彌積位逾厚而豐逾擁臣又聞  
月滿必虧日盈則蝕春秋有交謝之理星律有輪環之  
次時不再來榮難久藉昔永淳之後藩維構孽王室多  
難先聖考運從權時居寶曆臣諸房等地惟宗子爵列  
扞城竊祿疏封屢迴星紀今皇明復辟聖政惟新自合  
恭守園廬遙承雨露庇影椒房之末階親槐里之餘今  
乃再假寵靈驟貽獎渥姻從日茂爵封如初但見昇崇  
無聞損降高班厚位遂超涯極以此或陰氣僭陽乾文  
告變且頃年已來河洛汎溢東都西京俱有水潦蓋以  
陰氣太盛所致昔王家驕貴梅福上書竇氏專權丁鴻  
進諫臣伏思古來后妃之始自呂霍上官閻董之氏皆  
以恩寵過深驕盈僭溢一朝傾覆竟無鷲類易曰不遠

而復又曰鼎折足覆公餗伏願思抑損之宜運長遠之  
策或令安車就第使剖符臨州遠之以機權錫之以閑  
逸上恭乾乾之惕下全親親之道則肅彰國圖殷鑑後  
葉臣豐招酷罰待幣苦壤聖心不棄窮穢備官史册哀  
緒莫申餘陰無幾精魂屢竭昭恤末流如將有補明時  
不矜荒怠伏乞假名外郡遂禮私庭冀有識爽少訓覲  
冒臣瞻光視漏豈復支久既因災皆誠兼宗國俯揆殘  
骸退深荒越

乞御書題天下放生池碑額表 顏清臣

臣真卿言臣聞帝王之德莫大於生成臣子之心敢忘  
於讚述臣去年冬任昇州刺史日屬左驍衛左郎將史  
元琮中使張廷玉等奉宣恩命於天下州縣臨江帶郭  
處各置放生池始于洋州興道迄于昇州江寧秦淮太



平橋凡八十一所恩霑動植澤及昆蟲發自皇心徧于天下歷選列辟未之前聞海隅蒼生孰不欣喜臣時不揆愚昧輒述天下放生池碑銘一章又以俸錢於當州採石兼力拙自書蓋欲使天下元元知陛下有好生之德因令微臣獲廣音賢善頌之義遂繕寫一本附史元宗奉進兼乞御書題額以光揚不朽緣前書點畫稍細恐不堪經久臣今謹據石擘窠大書一本隨表奏進庶以竭臣下悽悽之誠特乞聖恩俯遂前請則天下幸甚豈唯愚臣皆秦始皇暴虐之君李斯邪諂之臣猶刻金石垂於後代魏文帝外禪之主鍾繇偏方之佐亦於繁昌立表頌德况陛下以巍巍功業而無紀述則臣竊恥之謹昧死以聞伏增戰越臣真卿誠惶誠恐頓首頓首死罪謹言

進張巡中丞傳表

李翰

臣聞聖主褒死難之士有死事之孤或親推轎車或追建封邑厚死有以慰生撫存有以答亡然後君臣之義貫以生死激勸之道著於存亡君所以不遺於臣臣所以不肯其君君恩臣節於是乎立伏見故御史中丞贈揚州大都督張巡生於昌時少習儒訓屬逆胡構亂凶虐滔天挺身下位忠勇奮發率烏合之衆當漁陽之鋒賊時竊據洛陽控引幽朔驅其猛銳吞噬河南巡前守雍丘潰其心腹反魯炁十萬之師棄甲於宛葉哥舒以天下之衆敗績於潼關兩宮出居萬國波蕩賊遂僭盜神器鸚峙兩京南臨漢江西逼岐雍群師遷延而不進列郡望風而出奔而巡獨守孤城不爲之却賊乃撓出巡後議圖江淮巡退軍睢陽扼其咽領前後拒守自春



徂冬大戰數十小戰數百以少擊衆以弱制強出奇無窮制勝如神殺其兇醜凡九十餘萬賊所以不敢越睢陽而取江淮江淮所以保全者巡之力也城孤糧盡外救不至猶奮羸起病摧鋒陷堅俾三軍之士噉膚而食知死不叛及城陷見執終無撓詞顧叱兇徒精貫白日雖古之忠烈何以加焉伏以光天文武大聖孝皇帝陛下聰明文思睿括神武提一旅之衆復配天之業賞功褒節大賚群臣遂贈揚州官及其子此誠陛下發德音之美也而議者或罪巡以食人愚巡以守死臣切痛之今臣敢取士倫以議巡過以塞衆口惟聖聰鑑焉臣聞人稟教以立身刑原情而定罪故事有虧教則人道不列刑有非罪則王法不加忠者臣之教恕者法之情今巡握節而死非虧教也析骸而爨非本情也春秋之義

以功覆過咎繇之典容過宥刑故大易之戒遏惡揚善爲一之體錄用棄瑕今衆議巡罪是廢君臣之教絀忠義之節不以功掩過不以刑恕情善遏惡揚錄瑕棄用非所以獎人倫明勸戒也且逆胡背德人鬼所讎朝廷衣冠沐恩累代大臣將相從逆比肩而巡朝廷不登坐宴不與不階一伍之衆不假一節之權感肅義旅奮身死節此巡之忠大矣賊勢憑凌連兵百萬巡以數千之衆橫而制之若無巡則無睢陽無睢陽則無江淮賊若因江淮之資兵彌廣財彌積根結盤據西向以拒王師雖終於殲夷而曠日持久國家以六師震其西巡以堅壘扼其東故陝郿一戰而犬羊北走王師因之而勢勝聲勢纔接而城陷此不意使巡保江淮以待陛下之師師至而巡死也此巡之功大矣古者列國諸侯或相



侵伐猶有分災救患之義况諸將同受國恩奉辭伐罪  
乎巡所以固守者非惟懷獨克之志亦以恃諸軍之救救  
不至而食盡食既盡而及人乘其本圖非其素志則巡  
之情可求矣設使巡守城之初已有食人之計損數百之  
眾以全天下臣猶曰勿過相掩况非其素志乎在周典  
之二宥其一曰宥過失故語巡之忠則可以敦世教議  
巡之切則可以繫中興原巡之情則可以宥過失晉夫子  
制春秋明褒貶齊桓將封禪略而不書晉文公召王河  
陽書而諱之蓋以匡戴之功大可以掩僭憚之過也今  
巡蒼黃之罪輕於僭禪興復之功重於匡戴罪疑惟輕  
功疑惟重聖人之訓昭然可徵臣故謂巡者足可以為  
訓矣臣又聞罰不及嗣賞延于世此三代所以直道而  
行今巡子亞夫雖受一官不免飢寒之患在淮既巡所  
保戶口充完臣謂宜封以百戶俾食其子臣又聞強死  
為厲遊魂為變有所歸往則不為災巡既身首支離將  
士等骸骼不掩臣謂宜於睢陽城北擇一高原招魂葬  
送巡并將士大作一墓而葬使九泉之魂猶思效命三  
軍之眾有以輕生既感幽明且無冤厲亦國家志過旌  
善垂誠百世之義也臣少與巡遊巡之所平生臣所知  
悉今巡死大難不覩休明惟期令名是其榮祿若不時  
紀錄日月寢悠或掩而不傳或傳而不實而巡生死不  
遇誠可悲焉臣敢採所聞得其親覩撰傳一卷昧死獻  
上伏惟陛下大明在上廣運臨下仁遐之德洽于艱難  
有善必紀無微不錄儻以臣所撰編列史官雖退死立  
壑骨而不朽臣翰誠惶誠恐頓首頓首死罪死罪

論佛骨表

韓退之



臣某言伏以佛者夷狄之一法耳自後漢時流入中國  
上古未嘗有也昔者黃帝在位百年年百一十歲少昊  
在位八十年年百歲顓頊在位七十九年年九十八歲  
帝嚳在位七十年年百五歲帝堯在位九十八年年百  
一十八歲帝舜及禹年皆百歲此時天下太平百姓安樂  
考然而中國未有佛也其後殷湯亦年百歲湯孫太  
戊在位七十五年武丁在位五十九年書史不言其年  
壽所極推其年數蓋亦俱不減百歲周文王年九十七  
歲武王年九十二歲穆王在位百年此時佛法亦未入  
中國非因事佛而致然也漢明帝時始有佛法明帝在  
位纔十八年耳其後亂亡相繼運祚不長宋齊梁陳元  
魏以下事佛漸謹年代尤促惟梁武帝在位四十八年  
前後三度捨身施佛宗廟之祭不用牲牢晝日一食止

於菜果其後竟爲侯景所逼餓死臺城國亦尋滅事佛  
求福反更得禍由此觀之佛不足事亦可知矣高祖始  
受隋禪則議除之當時群臣材識不遠不能深知先王  
之道古今之宜推闡聖明以救斯弊其事遂止臣常恨  
焉伏惟睿聖文武皇帝陛下神聖英武數千百年以來  
未有倫比即位之初即不許度人爲僧尼道士又不許  
創立寺觀臣常以爲高祖之志必行於陛下之手今縱  
未能即行豈可恣之轉令盛也今聞陛下令群僧迎佛  
骨於鳳翔御樓以觀昇入大內又令諸寺遠迎供養臣  
雖至愚必知陛下不惑於佛作此崇奉以祈福祥也直  
以年豐人樂徇人之心爲京師士庶設詭異之觀戲翫  
之具耳安有聖明若此而肯信此等事哉然百姓愚冥  
易惑難曉苟見陛下如此將謂真心事佛皆云天子大



聖猶一心敬信百姓何人豈合更惜身命焚頂燒指百  
十爲群解衣散財自朝至暮轉相倣倣惟恐後時老少  
奔波棄其業次若不即加禁遏更歷諸寺必有斷臂鬻  
身以爲供養者傷風敗俗傳笑四方非細事也夫佛本  
夷狄之人與中國言語不通衣服殊製口不言先王之  
法言身不服先王之法服不知君臣之義父子之情假  
如其身至今尚在奉其國命來朝京師陛下容而接之  
不過宣政一見禮賓一設賜衣一襲衛而出之於境不  
令惑衆也况其身死已久枯朽之骨凶穢之餘豈宜令  
入宮祭孔子曰敬鬼神而遠之古之諸侯行帛於其國  
尚今巫祝先以桃茆祓除不祥然後進帛今無故取朽  
穢之物親臨觀之巫祝不先桃茆不用群臣不言其非  
御史不舉其失臣實恥之乞以此骨付之有司投諸水  
火永絕根本斷天下之疑絕後世之感使天下之人知  
大聖之所作爲出於尋常萬萬也豈不盛哉豈不快哉  
佛如有靈能作禍祟凡有殃咎宜加臣身上天鑑臨臣  
不怨悔無任感激懇悃之至

賀雨表

臣某言臣聞聖人之德與天地通誠發於中事應於外  
始聞其語今見其真臣誠歡誠喜頓首頓首伏以季夏  
以來雨澤不降臣職司京邑祈禱實頻青天湛然旱氣  
轉甚陛下憫茲黎庶有事山川中使纔出於九門陰雲  
已垂於四野龍神效職雷雨應期嘉穀奮興根葉肥潤  
抽莖展穗不失時宜人和年豐莫大之慶微臣幸蒙寵  
任獲覩殊祥慶抃歡呼倍於常品無任踴躍之至謹奉  
表陳賀以聞



禮部賀冊尊號表

柳子厚

臣某伏奉月日制陛下膺受尊號率土臣子慶抃無窮臣聞立極之大四海無以報神功配天之尊萬物不能崇聖德唯有徽號是彰中興所以上探天心下極人欲伏惟元和聖文神武法天應道皇帝陛下統承千載光被六幽蠱賊盡除福應皆集有首有趾咸識太平勲臣增爵祿之榮戎士加賞延之寵片善必錄微功盡昇獨惟聖謩事絕酬答萬國缺望百工怨思是以啓元和之盛典延昊穹之景祚理歷凝命寔曰聖文和衆定功時惟神武運行有法天之用變化乃應道之方鬼神協謀夷夏同志大禮旣建鴻恩遂行歡呼遠市於九圍滲漉普周於八裔慶超邃古羨冠將來臣獲守蠻荒遠承大典潢汚比陋河清幸遂於千年塵壤均微山呼願同於萬歲無任慶賀屏營之至

奉天論延訪朝臣表

陸敬輿

臣某言賊泚逋誅尚宄宮禁陛下思念宗廟痛傷黎元仁孝交感至於憤激猥以急務下詢微臣臣雖鄙儒尊慕行義荷陛下知己之遇感陛下思理之誠愚衷所懷承問輒發不以淺深自揆不以喜怒上虞誠缺於周防承順之規是亦忠於陛下一至之分也前奉詔問尋具上陳請延群臣稍與親接廣咨訪之路開諫諍之門通壅鬱之情弘採拔之道自獻答奏迨茲彌旬不聞施行不賜酬詰未審宸旨以爲如何昧於忖量但務竭盡恐由辭理蹇拙不能暢達事情悽悽血誠酌願披瀝類煩黷冒豈不慙惶蓋犬馬感恩思效之心騰騰而不能自止者也臣聞立國之本在乎得衆得衆之要在乎見



情故仲尼以爲人情者聖王之由理道所由生也是則時之否泰事之損益萬化所繫必因人情情有通塞故否泰生情有厚薄故損益生通天下之情者莫智於聖人盡聖人之心者莫深於易象其別卦也乾下坤上乃爲泰乾上坤下乃爲否其取象也損上益下則曰益損下益上乃爲損乾爲天爲君坤爲地爲臣天在下而地處上於位乖矣而反謂之泰者上下交故也君在上而臣處下於義順也而反謂之否者上下不交故也氣不交則庶物不育情不交則萬邦不和天氣下降地氣上騰然後歲功成君澤下流臣誠上達然後理道立損益之義亦由是焉上約已而裕於人人必悅而奉上矣其不謂之益乎上蔑人而肆於己人必怨而叛上矣其不謂之損乎然則上下交而泰不交而否自損者人益

自益者人損情之得失豈容易哉故喻君爲舟喻人爲水言水能載舟亦能覆舟也舟即君道水即人情舟順水之道乃浮違則沒君得人之情乃固失則危是以古先聖王居人之上也必以其心從天下之心而不敢以天下之人從其欲乃至兢兢業業一日萬幾夫幾者事之微也以聖人之德天子之尊且猶慎事之微乃至一日萬慮豈不以居上接下懼失其情歟書曰人心惟危道心惟微則萬幾之慮不得不精也危則覆舟之誠不可不畏也夫揆物以意宣意以言言或是非莫若考於有迹迹或成敗莫若驗於已行自昔王業盛衰君道得失史冊盡在粲然可徵與衆同欲靡不興違衆自用靡不廢從善納諫靡不固遠賢恥過靡不危故詩書稱堯之德則曰稽于衆捨己從人數舜之功則曰明四目



達四聰言務同欲也序禹之所由興則曰益贊于禹禹  
拜昌言述湯之所以王則曰用人惟已改過不吝言能納  
諫也歌文王作周則曰濟濟多士文王以寧美武王克  
殷則曰亂臣十人同心同德言皆從善也堯舜禹湯文  
武此六君者天下之盛王也莫不從諫而輔德詢衆以  
成功是則德益盛而慮益微功愈高而意愈下及代之  
衰也則道亦反焉故書曰紂有億兆夷人離心離德言  
違衆也詩曰汝炮休于中國歛怨以爲德不明爾德時  
無背無側爾德不明以無背無卿又曰雖無老成人尚  
有典刑曾是莫聽大命以傾言遠賢也書曰謂人莫已  
若者亡詩曰惟彼不愼自獨俾臧自有肺腸俾人卒狂  
言自用也前史數桀紂之惡曰智足以拒諫言足以飾  
非言恥過也考得失於已行之迹鑑盛衰於已驗之符  
孰失道而不衰孰得理而不盛報應以類影響不差胡  
可不則而象之敬而畏之乎自秦漢暨于周隋其間將  
歷千載代興者非一姓繼覆者非一君雖所遇殊時所  
爲異迹然失衆必敗得衆必成與堯舜禹湯同務者必  
興與桀紂幽厲同趣者必覆多同於善則功倍多同於  
惡則禍甚善惡同類端如貫珠成敗象行明若觀火此  
歷代之元龜也尚恐議者曰時異事殊臣請復爲陛下  
粗舉近效之尤章者以辯焉太宗文皇帝以天縱之才  
有神器之重武定禍亂文致太平威行如雷霆明照侔  
日月英略施於百勝聖功被於九歌固非庶品之所度  
量常情之所鑽仰然猶兢兢畏慎懼失人心每戒臣下  
獻規恒以危亡爲慮夙興聽理日旰忘勞公卿迭進廷  
奏庶務評議得失與衆共之下無滯情上無私斷退朝



之暇宴接待臣咨訪謀猷詢求過闕或論往古成敗或問人間事情每言及暗主亂朝則省懼自戒言及賢君理代則企竦思齊言及稼穡艱難則上下相匡務遵勤儉言及閭閻疾苦則君臣同慮議息征徭懋德徵違觸類滋長尚恐過言謬舉既往難追每召宰輔平章必遣諫官俱入小有頗失隨即箴規得一善必遽命甄升聽一諫必明加褒錫故得時無闕事人樂輸誠又引文學之流更直宿於內署或講求典禮或諷誦詩書每至夜分情忘厭倦伏以太宗之德美貞觀之理安且猶務得人心其勤若此是則人之於理道可一日不接乎高宗初年亦親聽納故當時翕然歸美以為有貞觀之風兼賴遺澤在人先範垂裕幸無改作俗以阜康數十年間天下無事承平之業滋久倦怠之意頗彰燕居益深接下彌簡前拓之耿光滯遠中宮之威柄潛移卒有嗣聖臨朝天授革命豈不以經邦之道闕疇咨於大猷宴安之懷溺偏信於近狎馴致禍變幾將傾危雖亂匪自他然其失一也弊俗一靡餘風遂流訖神龍景雲之間皆嬖倖亂朝忠義不達玄宗躬定大難手振宏綱開懷納忠克已從諫專用舊老廣採群才大臣不敢壅下情私昵不敢干公議朝清道泰垂三十年謂化已成謂安可保耳目之娛漸廣憂勤之志稍衰侈心一萌邪道並進貪權竊柄者則曰德如堯舜矣焉用勞神承意趣利者則曰時已太平矣胡不為樂有深謀遠慮者謂之迂誕驚眾有讜言切諫者謂之誹謗邀名至尊收視於穆清上宰養成於廊廟諫曹以頌美為奉職法吏以識旨為當官司府以厚歛為公忠權門以多賂為聞望外寵持



竊國之勢內寵擅迴天之謠禍機熾然燄燄滋甚舉天下如居積薪之上人人懼焚而朝廷相蒙曾莫之省日務遊宴方謂有無疆之休大盜一興至今為梗豈不以忽於戒備逸於居安憚忠鯁之拂心甘諛詐之從欲漸漬不聞其失以至於大失乎肅宗懲致寇之由蘊撥亂之略虛受廣納同符乎太宗招延詢謀輟食廢寢洞啓誠府推心與人豁披曾襟忘已應物故得來蘇之望允塞配天之業勃興先皇帝繼守恭勤而益之以和惠惠則有感和則有親雖時經艱屯而衆不離析理尚寬大務因循而重改作然於紫宸聽朝常限三人奏事時亦宣諭德令課責侍臣或賞其盡規或含以容默性本仁恕事多弘讓諫雖未從且不深忤情苟有阻終獲上通故君臣相安而人亦小息陛下英姿逸辯邁絕人倫武

略雄圖牢寵物表憤積習以妨理任削平而在躬以明威照臨以嚴法制斷流弊自久浚恒太深遠者驚疑而阻命逃死之亂作近者畏懼而偷容避罪之態生君臣意乖上下情隔君務致理而下防誅夷臣將納忠又上慮欺誕故睿誠不布於群物物情不達於睿聰臣於往年曾任御史獲奉朝謁僅欲半年陛下嚴邃高居未嘗降旨臨問群臣跼蹐趨退亦不列事奏陳軒墀之間且未相諭宇宙之廣何由自通雖復例對使臣列延宰輔既殊師錫且異公言未行者則戒以樞密勿論已行者又謂之遂事不諫漸生拘礙動涉猜嫌由是人各隱情以言為諱至於變故將起億兆同憂獨陛下恬然不知方謂太平可致陛下以今日之所覩驗往時之所聞孰真孰虛何得何失則事之通塞備詳之矣人之情偽盡



知之矣列聖升降之效歷歷如彼當今理亂之由昭昭如此未有不興於得衆殆於失人裕於僉諧蔽於偏信濟美因乎納諫虧德由乎自賢善始本乎憂勤失全萌乎安汰今陛下將欲悔禍徼福去危從安若不循太宗創業之規襲肅宗中興之理鑑天寶致亂之所以懲今者遷幸之所因則何以孚聖懷揚令聞新遠邇之聽歸反側之心乎前承德音訪及庸鄙敢緣斯義輒以獻聞自爾以來反覆千慮愚智有分信非可移至今拳拳猶滯所見不勝愚誠懇款謹復布露以聞臣惶怖死罪謹言

為并州長史張仁亶進九鼎銘表 吳少微

臣聞鼎者夏后氏作群牧貢金遠方圖物備諸山澤以禦魑魅厥後嗣德昏亂鼎遷于商夏之寶也祀不足徵殷既有之又患失之周德休明神寶不墜百代可繼伏惟陛下光大而當之若乃崇貴之器金玉之鼎鎔首山發睢上列太廟序明堂克明靈命以奉上帝非愚臣所敢議臣聞禮之興也始諸飲食故先王之制曰舉九鼎蓋筠藥淳熬澄瀝膏餌御九州之美順四時之和臣所以征繕北金敢貢新鼎夫有器必有名臣竊見九州同迺述九號夫永昌天中所以基皇周也長安及岐所以紀靈瑞也武興建都所以光帝閉也禮曰觀禪云云所以美升中也少陽載青所以冀儲德也東原底平所以廣封植也江都淮海所以肆朝宗也江陵作鎮所以制荆蠻也成都奧區所以遏珍貢也夫此九者誠不足掄衍鴻休昭振方統庶覩者美其所稱知有由作微臣朽老不達有慙歌頌塵八命之寵章負中軍之重任匪躬厥獻伏表流汗其九鼎銘謹敢列上謹遣某官某奉鼎



以聞臣某

文翰類選大成卷第一百四十二

文類翰選大成卷第一百四十二表目錄

宋

竇儀 一道

晏同叔 一道

富彥國 一道

王介甫 二道

柳子儀 一道

元

程文海 二道

劉敏中 一道

李冶 一道

虞伯生 二道

王元之一道

韓維圭 一道

歐陽永叔 六道

蘇子瞻 三道

真希元 一道

夏子喬 一道

范希文 一道

司馬君實 一道

楊大年 三道

吳幼清 一道

楊文郁 一道

楊桓 一道

謝端 一道

歐陽原功 一道

姚登孫 一道

王惲 一道

盧亘 一道

國朝

文翰類選大成卷第一百四十二目錄



蘇伯衡 一道  
王偉 一道  
解摺 一道  
胡儼 一道  
胡廣 一道  
楊士奇 一道  
李賢 一道

文翰類選大成卷第一百四十二表目錄

文翰類選大成卷第一百四十二

左長史上海李伯璣編輯  
紀善慈谿馮厚校正

表類  
宋

進刑統表

實儀

臣聞虞帝聰明始恤刑而御物漢高豁達先約法以臨人蓋此丹書輔于皇極禮之失則刑之得作於其處又慮混雜律文本注並加釋曰二字以別之務令檢討之司曉然易達其有今昔浸異輕重難同或則禁約之科刑名未備臣等起請摠三十二條其格令宣敕削出及後來至今續降要用者凡一百六條今別編分為四卷名曰新編敕凡釐革一司一務一州一縣之類并于大



例者不在此數草定之初尋送中書門下請加裁酌盡以平章今則可否之聞上繫宸鑑將來若許頒下請與式令及新編敕兼行其律并疏本書所在依舊收掌所有大周刑統二十一卷今後不行臣等幸偶文明謬參憲法金科奧妙比虧洞達之能丹筆重輕徒竊討論之寄將塵睿覽唯俟嚴誅

黃州謝上表

王元之

乍離近侍猶忝專城循省尤違彌深感泣伏以黃州地連雲夢城倚大江唐時叛藉二萬家稅錢三萬貫今人戶不滿一萬稅錢止及六千雖久樂昇平尚未臻富庶未言養活亦藉循良如臣庸愚曷副憂寄謹當勤求人瘼遵奉詔條窒塞囂訟之民束縛檢猾之吏敢言課最庶免曠遺况當求理之朝必為無害之政伏念臣叨司

帝誥又歷周星既不曾上殿求見天顏又不曾拜章論列時事入直則閉閣待制退朝則杜門讀書雖每日起居實經年抱疾不敢求假恐煩醫官自後忝預史臣同修實錄晝夜不捨寢食殆忘已盡建隆四年見成一十七卷雖然未經進御自謂小有可觀忽坐流言不容絕筆夫讒謗之口聖賢難逃周公為鷓鴣之詩仲尼有桓魋之歎蓋行高於人則人所忌名出於眾則眾所排自古及今鮮不如此伏望皇帝陛下雷霆霽怒日月迴光鑑曾參之殺人稍寬投杼察顏回之盜飯或出如簧未令君子之道消惟賴聖人之在上况臣孤平無援文雅修身不省附離權臣祗是遭逢先帝但以心無苟合性昧隨時出一言不愧於神明議一事必歸於正直愠於群小誠有謗詞謀及卿士豈無公論以至兩朝掌誥四



任詞臣紫垣最忝於舊人白首不離於郎署以微臣之行已遇陛下之至公又當辯明未敢伸埋今則上國千里長淮一隅雖云守土之榮未免謫居之歎霜摧風敗芝蘭之性終香日遠天高葵藿之心未死仰望旒展不勝涕洟

謝直集賢院表

夏子喬

北門禁省給青簡以試言東觀直廬降紫泥而命職莫道假人之刺彌彰遇主之榮竊以承明設待詔之官是漢朝之芳潤麗正啓修書之院乃唐氏之英華濬圖書之淵故龍鳳之宇自非弓裘繼世車句名家通授義畀歟之靈篇閑書笏珥彤之故事則何以繼成康之嘉頌考宣武之懿文陪法從於甘泉奉宸游於屬玉况當聖日允屬簡求如臣者學不傳經文非近史青青子佩雖

見刺於勞心翹翹錯薪亦濫期於刈楚筮仕勝衣之歲薦名象日之畿方博帶以觀光遽墨衰而泐牒尋遇國家誕敷尺詔增廣六科方棲枳以待勞遂上封而自薦始較文於鼇苑旋試可於鼎司亟趨文石之墀遂忝延英之問擊轅度曲敢望於九成縈帶分墉俄登於百雉陞象河之屬吏佐分虎之方州爰受代於瓜時遂歸朝於幄坐典陳陳之粟閱山委之丘區從九九之車總絲琴之案牘暨還衡睢壤舍爵太宮既諧引藉於金闈將佐于藩於熊軾又慮汎迷薄領廢墜簡編負公朝振舉之科辜聖主詳延之意遂殺青而奏技果出綍以推恩禁林俾試於彫蟲書殿遽令於抱槧閱上帝之冊府日眩星辰登道家之蓬山足踐雲氣奉長者之餘論與先生而並行分直石渠地接嚴更之守縱觀金匱門連著



作之廷載惟螻螻之軀莫報乾坤之賜恭惟尊號皇帝  
陛下事寢廟以至孝奉靈祇而克誠流鴻藻於絕垠鏤  
景炎於往號以文明而行健體柔克以居高縱觀唐漢  
之大猷備舉黃虞之故實曆藻和而六同韻天章麗而  
五佐飛恢崇務廣於斯文獎擢不遺於小道遂使至孤  
之士獲塵非次之恩東陵遽擬於西山羔裘遂登於狐  
腋歌衛風而合雅鸞齊紫而雜良誠當繁節於素絲敢  
不盟心於白水益三思而出話彌九復以窮經永冰淵  
惕勵之心奉日月照臨之鑑庶追素食之謗仰醅明主  
之知媿懼所深兢惶不已

侍讀學士等請宮中視學表 晏同叔

伏奉聖旨以時暑暫住講書至秋涼仍舊者運當文治  
日視講筵以炎暑之盛隆遂紫宸之游息載頒明旨允  
合舊章伏惟皇帝陛下應運挺生代天化育御承堯之  
法座臨照九圍奉長樂之慈顏緝熙萬務緬懷三聖撫  
愛兆民知王業之艱難識帝模之宏遠於是順稽古道  
崇尚素風命用府之儒臣敬金華之經席包周衆說既  
析於篇題齊魯善言彌勤於聽覽屬南薰之屆候憫會  
弁之增勞暫錫假寧聿昭恩遇臣等退惟鄙質幸此親  
逢敢忘矇瞶之言仰效涓毫之助竊以四方無事百度  
允釐宮禁之閑穆清多豫伏願重漢皇之六學惜夏禹  
之寸陰時習所聞愈精大義閒揮仙翰式就神工彰睿  
德之日新廣鴻猷之天賦如此則宗枋景福贊明主之  
保邦夷夏仰瞻識大朝之垂教

謝除使相判相州表

韓稚圭

宰職隳功莫副宵衣之治鄉邦得請重叨畫錦之行被



恩典之特優顧人言而甚愧伏念臣早繇科第遂玷寵  
榮不圖翰墨之進身自竭消塵而報國備負諫諍幾不  
免於竄投奮命彊陸實存罹於艱阻獨恃聖神之眷誰  
開援助之言仁宗皇帝知其守以孤忠謂可屬之大事  
慶曆之始已擢貳於樞機嘉祐之中乃進登於宰輔俄  
膺冢任益荷殊知當英廟之承桃逮聖人之嗣服稠重  
遭會罄竭愚庸惟知社稷之安豈顧家宗之末然而萬  
微多務一紀妨賢為國持平敢自私於輕重裁人所欲  
固難免於愛憎加疾疹之嬰纏苦形神之耗弊勉訖因  
山之禮懇陳上印之宜伏蒙皇帝陛下念犬馬之力易  
衰廓日月之明為照不罪再三之請亟垂開可之音進  
秩地官剖符粉社建高牙之重既疏淮海之封增故里  
之光仍襲貂蟬之舊叨塵之甚今古疇偕敢不思盡瘁  
於寢興泯實懷於內外在邊在庭之貴惟驅策以當

益堅益壯之心至縻捐而後已

謝轉禮部員外郎充天章閣待制表 范希文

渙渥自天震惶無地改中臺之華序進內閣之清班盡  
出高明殊登秘近竊念臣發自顏巷賓于舜門一第為  
榮四方無效爰自書林預選閨籍升華恥汨沒以懷安  
或感激而論事惟慕古人之節詎希英主之知伏惟尊  
號皇帝陛下稟帝堯之聰明加漢高之豁達 聖懷而  
虛受期鴻化以咸孚念三聖之艱難而成丕業求七人  
之蹇諤以補大猷臣獨愧非才首當清問危言多犯孤  
立自持斧鉞居前雷霆在上敢避樞機之禍終乖藥石  
之良陛下日月垂光江海敦量恕其萬死假之一塵望  
已絕於青雲咎未更於鴻濡俄易藩宣之寄寧分肝臭



之憂忽降綸章存加寵數而况闢圖書之府叨處於深  
嚴踐雲龍之庭當備于顧問非名儒而不稱豈曲士之  
能堪矧造清曹仍居舊治輝榮大集士願何求敢不內  
守朴忠外修景行進退惟道遵聖賢視履之方始終一  
心副君父育材之造

辭起復表

富彥國

喪次銜哀甫終卒哭使華傳命繼至弊廬心積驚憂情  
深屠裂雖屢傾於丹懇尚未錫於俞音天遠莫量物微  
難動不避褻煩之咎更陳隕絕之詞必冀神聰俯從哀  
請伏念臣早罹家難偏奉母慈猥以蠢愚最鍾愛育享  
祿未幾遽纏風樹之悲報德未逮徒懷霜露之感寢苦  
枕塊而適抱至痛食稻衣錦則若為自安實非人情尤  
紊邦制况今中外無事左右得賢共輔聖明之期安有

隳曠之務曲蒙下詔更起孤臣在陛下馭國之方蓋欲  
不遺於舊物於朝廷敦化之道必恐有誤於蒼生何須  
稽故事以遂前世之非正可存禮經以圖今日之善行  
之即是義不為難豈惟於陛下有復古之風抑亦俾愚  
臣得事親之道一為匪戾兩得其宜兼臣悲傷之餘衰  
病交至精力已耗神觀未還假使充貞豈堪應務苟令  
終畢於祥禫庶幾稍復於幹魂得此從容可備驅策伏  
望尊號皇帝陛下日月臨照天地包容盡母氏平生之  
恩憐人子罔極之苦曲矜末志得滿鉅憂生意凋零或  
尚未捐於溝壑清光咫尺終期復望於雲天悲感增深  
懇願兼劇

謝知制誥表

歐陽永叔

伏以王者尊居萬民之上而誠意能與下通奄有四海



之大而惠澤得以徧及者得非號令誥詔發揮而已哉  
然其為言也質而不文則不足以行遠而昭聖其麗而  
不曲則不足以示後而為世法居是職者古難其人乃  
以愚臣而當此選伏惟尊號皇帝陛下茂仁聖之姿荷  
祖宗之業日謹一日曾未少懈而自羌戎負固邊鄙用  
師勤儉率先於聖躬焦勞常見於玉色雖有憂民之志  
而億姓未蘇雖有欲治之心而群臣未副故每進一善  
則未嘗不欲勸天下之能每官一賢則未始不欲盡人  
材之用雖以爵祿而砥礪尚須訓誡之丁寧尤假能言  
以諭至意可稱是者下又一作艱歎伏念臣雖以儒術  
進身本無辭藝可取徒值嚮者時文之弊偶能獨守好  
古之勤志欲去於雕華文反成於樸鄙本懼不適當世  
之用敢期自結聖主之知陛下獎之特深用之太過此

臣所以懇讓三四至於辭窮而天意不回寵命難止尚  
慮頑然之未諭更加使者以臨門恩出非常理難屢瀆  
及俯而受命伏讀訓辭則有必能復古之言然後益知  
所責之重夙夜惶惑未知所措伏况文字之職廁于侍  
從之班在於周行是為超擢不徒揮翰以為效自當死  
節以報恩惟所使之期於盡瘁

賀平具州表

盜孽竊興人祗共忿果憑睿筭悉殄兇徒伏惟尊號皇  
帝陛下推仁育物浸澤在人常服儉以躬行惟足兵而  
在念至於多捐金幣講好戎夷務休戰爭蓋惜士卒德  
至深而莫報恩既厚則生驕敢肆妖狂自干斧鉞脅驅  
士眾閉守城圍既違天而逆人宜不攻而自破而况聖  
神運略將相協忠不遺一人咸即大戮悖慢者警而肅



恪昏愚者知有誅夷銷沮姦萌震揚威令臣幸忝郡寄  
忻聞德音

謝復龍圖閣直學士表

恩還舊職事雪前誣感極心驚涕隨言出臣伏見前世  
材賢之士身結主知勲德之臣叨施王室然尚或一遭  
謗毀欲辨無由少忤要權其禍不測顧如臣者何是道  
哉臣材不迨於中人切無益於當世用之未見有效去  
之無足可思矧罔極之讒交興而並進易危之迹何恃  
而不顛而聖心不忘恩意特至辨罔欺於曖昧沮仇嫉  
於衆多雖暫居譴謫之中而屢被陞遷之渥今又特蒙  
甄錄牽復寵名以臣之愚豈比前人而獨異推其所幸  
蓋由聖主之親逢謂宜如何可以論報再念臣稟生孤  
拙本乏藝能徒因學古之勤粗識事君之節苟臨危效

命尚當不顧以奮身況為善無傷何憚竭忠而報國誓  
期盡瘁少答高明

乞致仕表

臣近貢封章乞還官政伏奉詔答未賜允俞退自省循  
奚勝殞越臣聞神功不宰而萬物得以曲成者惟各從  
其欲天鑑孔昭而一言可以感動者在能致其誠敢傾  
虔至之心再贖高明之聽伏念臣本以一介之賤叨塵  
二府之聯知直道以事君每師心而自信然而既乏捐  
驅之效又無先覺之明用之已過其分而曾不自量毀  
者不堪其辱而莫知引去幸賴乾坤之再造得逃陷穽  
之危機仍許避於要權俾退安於晚節今乃苦於衰病  
莫自支持顧難冒於寵榮始收於骸骨敢期聖念過軫  
天慈謂雖迫於桑榆未忍棄於草莽竊以古今之制必



襲不同蓋由兩漢而來雖處三公之貴每上還於印綬  
多自駕於車轅朝去朝廷暮歸田里一辭高爵遂列編  
民豈如至治之朝深篤愛賢之意每示隆恩之典以勸  
知止之人故雖有還政之名而仍享終身之祿固已不  
類昔時之士無殊居位之榮然則在臣素心雖竊退休  
之志迹臣所乞尚虞僥倖之譏伏望皇帝陛下惻以深  
仁矜其至懇俾解方州之任遂歸環堵之居固將優游  
垂盡之年涵泳太平之樂惟辛勤白首迄無一善之稱  
孤負明時莫報三朝之德此為慙恨何可勝陳

謝賜漢書表

俯躬承命拭目生輝竊以右文興化乃致治之所先著  
錄藏書須太平而大備惟漢室上繼三代之統而班史  
自成一家之書文或舛訛蓋其傳之已久詔加刊定俾

後學之無疑一新方冊之文增煥祕書之府而奏篇之  
始方經衡石之程賜本之榮惟及鈞樞之近敢期孤外  
特與恩頒此蓋伏遇皇帝陛下曲軫睿慈俯矜舊物謂  
其嘗與臣鄰之列不忍遽遺憐其自喜文字之閒俾之  
娛老然臣兩目昏眊雖嗟執卷之已艱十襲珍藏但誓  
傳家而永寶

進修唐書表

竊惟唐有天下幾二百年其君臣行事之始終所以治  
亂興衰之蹟與其典章制度之美宜其粲然著在簡冊  
而紀次無法詳略失中文采不明事實零落蓋又百有  
五十年然後得以發揮幽昧補緝闕亡黜正偽謬克備  
一家之史以為萬世之傳成之至難理若有待伏惟尊  
號皇帝陛下有虞舜之智而好問躬大禹之聖而克勤



天下和平民物安樂而猶垂心積精以求治要日與鴻生舊學講誦六經考覽前古以謂商周以來為國長久惟漢與唐而不幸接乎五代衰世之士氣力卑弱言淺意陋不足以起其文而使明君賢臣雋功偉烈與夫昏虐賊亂禍根罪首皆不得暴其善惡以動人耳目誠不可以垂勸戒示久遠甚可歎也乃因邇臣之有言適契上心之所閱於是刊脩官翰林學士兼龍圖閣學士給事中知制誥臣歐陽脩端明殿學士兼翰林侍讀學士龍圖閣學士尚書吏部侍郎臣宋祁編脩官禮部郎中知制誥臣范鎮刑部郎中知制誥臣王疇太常博士集賢校理臣宋敏求祕書丞臣呂夏卿著作佐郎臣劉義叟等並膺儒學之選悉發祕府之藏俾之討論共加刪定凡十有七年成二百二十五卷其事則增於前其文則省於舊至於名篇著目有革有因立傳紀實或增或損義類凡例皆有據依纖悉網條具載別錄臣公亮曲司事領徒費日月誠不足以成大典稱明詔無任慙懼戰汗屏營之至

上資治通鑑表

司馬君實

臣光言先奉敕編集歷代君臣事迹又奉聖旨賜名資治通鑑今已了畢者伏念臣性識愚魯學術荒踈凡百事為皆出入下獨於前史粗嘗盡心自幼至老嗜之不厭每患遷固以來又字繁多自布衣之士讀之不徧況於人主日有萬機何暇周覽臣常不自揆欲刪削冗長舉撮機要專取關國家興衰係生民休戚善可為法惡可為戒者為編年一書庶使前後有倫精粗不雜私家力薄無由可成伏遇英宗皇帝資睿智之性敷文明



之治思歷覽古事用恢張大猷爰詔下臣俾之編集臣  
夙昔所願一朝獲伸踴躍奉承惟懼不稱先帝仍命自  
選辟官屬於崇文殿置局許借龍圖天章閣三館祕閣  
書籍賜以御府筆墨繒帛及御前錢以供果餌以內臣  
為承受眷遇之榮近臣莫及不幸書未進御先帝違棄  
群臣陛下紹膺大統欽承先志寵以冠序錫之嘉名每  
開經筵常令進讀臣雖頑愚荷兩朝知待如此其厚隕  
身喪志未足報塞苟智力所及豈敢有遺會差知未興  
軍以衰疾不任治劇乞就冗官陛下俯從所欲曲賜容  
養差判西京留司御史臺及提舉嵩山崇福宮前後六  
任仍聽以書局自隨給之祿秩不責職業臣既無他事  
得以研精極慮窮竭所有日力不足繼之以夜編閱舊  
史旁采小說簡牘盈積浩若煙海抉擿幽隱校計豪釐

上起戰國下終五代凡一千三百六十二年修成二百  
九十四卷又略舉事日年經國緯以備檢尋為目錄三  
十卷又參考群書評其同異俾歸一塗為考異三十卷  
合三百五十四卷自治平開局迄今始成歲月淹久其  
間抵牾不敢自保罪負之重因無所逃臣光誠惶誠懼  
頓首頓首重念臣違離闕廷十有五年雖身處于外區  
區之心朝夕寤寐何嘗不在陛下之左右願以駑蹇無  
施而可是以專事鉛槧用酬大恩庶竭消塵少裨海岳  
臣今筋骸癯瘁目視昏近齒牙無幾神識衰耗目前所  
為旋踵遺忘臣之精力盡於此書伏望陛下寬其妄作  
之誅察其願忠之意以清閑之燕特賜省覽監前世之  
興衰考當今之得失嘉善矜惡取是捨非足以懲稽古  
之盛德躋無前之至治俾四海群生成蒙其福則臣雖



委骨九泉志願永畢矣

賀赦表

王介甫

臣某言伏覩十一月二十五日南郊禮畢大赦天下者  
精意上昭神靈底豫茂恩旁暢夷夏接和臣某誠歡誠  
抃頓首頓首臣聞道以饗帝為難禮以配天為至有秩  
斯祐唯四表之歡心胡臭亶時匪九州之美味自古在  
昔若聖與仁厥遭昌辰乃覩熙事恭惟皇帝陛下邁種  
三德敷奏九功率籲奉璋之眾髦肇稱奠璧之新禮廟  
邊致孝郊血告幽誠既格於穹旻福遂均於品庶振憂  
矜寡原有眚哉第五王以褻封善人是富發三錢而慶  
賜賤者不虛天其居歆人以呼舞臣夙叨寵獎親值休  
成雖無預於駿奔實不勝於竊抃

謝翰林學士表

臣聞人臣之事生患在不知學術而居寵有冒昧之心  
人主之畜臣患在不察名實而聽言無惻怛之意此有  
天下國家者所以難於任使而有道德者亦所以難於  
進取也學士職親地要而以討論諷譏為官非夫遠足  
以知先王迹足以見當世忠厚篤實兼馳之操足以咨  
諏而不疑草創潤色文章之才足以付托而無負則在  
此位而無以稱如臣不肖涉道未優初無犖犖過人之  
才徒有區區自守之善以至將順建明之大體則或踈  
闊淺陋而不知加以憂傷疾病又棄里閭辭命之習蕪  
廢積年黽勉一州已為忝冒禁林之選豈所堪任伏惟  
皇帝陛下躬聖德承聖緒於群臣賢否已知考慎而於  
其言也又能虛己以聽之故聰明叡智神武之實已見  
於行事日月未久而天下翹首企踵以望唐虞成周之



太平臣於此時實被收召所以許國義當如何敢不磨礪淬濯已衰之心紬繹溫尋久廢之學上以備顧問之所及下以拱職司之所守

謝御膳表

蘇子瞻

臣伏蒙聖恩特賜寬假將理今日七月七日又再蒙中使臨賜御膳問其治療之增損督以朝參之日辰臣下履淵冰上負芒刺蹄泮雖小能延兩曜之光寸草何知莫報三春之澤正使豚魚幽陋木石堅頑尤將激勵忘軀奔走赴職而臣尚有無厭之請敢守不移之愚在法當誅原情可免實以負薪之疾積有歲時勿藥之祥恐非旦夕終願江淮之一郡以安犬馬之餘生尚冀此身未填溝壑期於異日別效涓埃

徐州謝獎諭表

臣軾言伏奉今日四月四日勅以臣去歲脩城捍水粗免踈虞特賜獎諭者奔走服勤人臣之常事褒稱勞勉學者之至榮自惟何人乃辱斯語伏念臣學無師法才與世踈經術既已不深吏事又其所短累忝優寄卒無異稱寬如定遠之言平平無取拙比道州之政下下宜然乃者河決澶淵毒流淮泗百堵皆作蓋僚吏之劬勞三板不沈本朝廷之威德而臣下掠衆羨上貪天切獨竊璽書之榮以為私室之寶此蓋伏遇皇帝陛下天覆四海子養萬民哀無辜之遭罹特遣使以存問既蠲免以賦調又飲食其饑寒所以錄臣之微勞蓋將責臣之來效臣敢不躬親畚築益修今歲之防安集流亡盡復平時之業庶殫朽鈍少補絲毫

謝宣召入院表



右臣今日西頭供奉官充待詔董士隆至臣所居奉  
宣聖旨召臣入院充學士者詔語春温再命而偃使華  
天降一節以趨在故事以嘗聞豈平生之敢望省循非  
稱愧汗交深竊以視草之官自唐爲盛雖職親事祕號  
爲北門學士之榮而祿薄地寒至有京兆掾曹之請豈  
如聖代一振儒風非徒好爵之縻兼享大烹之養玉堂  
賜篆仰淳化之彌文寶帶重金佩元豐之新渥旣厚其  
禮愈難其人而臣以空疎冗散之材衰病流離之後生  
還萬里坐閱三遷不緣左右之容躡處賢豪之上此蓋  
伏遇皇帝陛下生資文武天胙聖神雖亮陰不言尚  
隱高宗之德而小莛求助已啓成王之心首擇輔臣次  
求法從知人材之難得采虛名而用臣敢不益勵初心  
力圖後效身不逮古雖慙內相之名志嘗在民庶免私

人之誦

駕幸河北起居表

楊大年

毳幕稽誅鑿輿順動羽衛方離於象魏天威已震於龍  
荒慰邊氓後后之心增壯士平戎之氣臣聞涿鹿之野  
軒皇所以親征單于之臺漢帝因之耀武用殲夷於兇  
醜遂底定於邊陲五材並陳蓋去兵之未可六龍時邁  
固犯順以必誅矧朔漠餘妖腥膻雜類敢因膠折之候  
輒爲鳥舉之謀固已命將出師擒俘獻馘雖奪名王之  
帳未焚老上之庭是用親御戎車躬行天討勞軍細柳  
之壁巡狩常山之陽師人多寒感恩而皆同挾纊匈奴  
未滅受命而孰不忘家行當蕭靜塞垣削平夷落梟冒  
頸之首收督亢之圖使遼陽八州之民得聞聲教榆關  
千里之地盡入提封蛇豕之穴悉降干戈之事永戢然



後登臨瀚海刻石以銘功陟降云亭泥金而典禮遠追八九之迹永垂億萬之年臣忝守方州莫參法從空勵請纓之志慙無扈蹕之勞唯聆三捷之音遠同百獸之舞

謝賜衣表

解衣之賜猥及於下臣挾纊之仁更均於列校光生郡邸喜動轅門伏以崇文廣武聖明仁孝皇帝陛下誕膺元符恭臨大寶惠必先於逮下志惟在於愛人鳥獸氄毛俯及嚴凝之候衣裳在笥爰推賜予之恩在渙汗之所沾雖容光而必照如臣者任叨符竹地僻甌吳奉漢詔之六條方深祗畏分齊官之三服忽荷頒宣纂組極於織華純絲加於麗密璽書下降切窺雲漢之文駟騎來臨更重皇華之命但曳婁而增惕實被服以難勝矧於戎行亦膺天寵干城雖久皆無汗馬之勞守土何功獨懼濡鷄之刺仰瞻宸極唯誓縻捐

汝州謝上表

沈痾初釋寵寄存臻祇命惟寅飭裝靡暇初臨郡閣獲見吏民揣已若驚戴恩罔措伏念臣本由單弱特稟方愚以童刻之微能際帝圖之亨會驟參綸掖獲草芝函屬以堯德彌文漢辭爾雅雲章有爛諒黼黻以何施天律惟精亦哇咬之罔棄居常摩厲徒益空踈俄踐內庭預司密命值皇闈之有慶扈清蹕以多歡窺雲瑞於封中聽棹歌於汾曲四巡第頌誠辯麗之絕聞二豎興妖致冥煩之坐邁偶嬰沈痾遂劇支離因請急以歸寧遽迷魂而不復率由蹇否自抵困窮矧以叢爾之軀煢然去職羈孤至甚毀嫉居多嘖有煩言實盈庭之可畏諮



然大度終如地以見容比及痊平果蒙齒敘此蓋尊號  
皇帝陛下仁深慘怛德茂欽明軫舊故以興懷俾肖翹  
之遂性特加采錄令獲便安伏况臨汝舊邦陪京近輔  
姬文之化所及首載聲詩地官之籍攸分寔繁兵賦土  
多巖險民或惰游置使劭農抑惟令典分條察俗蓋有  
新書臣亦夙侍疑嚴僭窺律度敢忘瘁盡以奉化成然  
念臣早以斷斷之薄材獲齒振振之近列典司訓誥就  
望威顏讀銘字於湯盤時瞻景式載史言於董筆獲次  
舊聞舛命邁屯榮階絕迹酒泉素願敢望於生賜麗正  
殘編幾成於死恨今者星畿接眇竹使長人預方國之  
頒書稟天臺之布憲水深土厚足養於槁骸晝訪夕修  
冀無於稅政親未光而彌阻感再造以難勝

賀冊皇太子表

劉子儀

前耀開祥東闈播憲漢儀丕赫天下之本既豐周制協  
敷王者之基克固殊尤顯會中外祇懼恭以十翼垂言  
黃離之象攸著四瀆流潤重海之歌載揚于以示元吉  
之有孚表善利之需廣正人倫而張大紀統天序而荷  
亨衢陪翼至仁登閑昌祚允鍾聖嗣克奉宗祧伏以皇  
太子器本夙成智包妙用挺溫姿而王裕藹淑度以金  
相至性迪乎天經積粹發乎真系而自桂房毓秀菜壤  
疏榮有時敏之進修有日躋之駿惠固以悟喬枝而奉  
順詢內衛以宣勤務近老成之人歷觀盛德之事實忠  
信而由已服禮樂以蹈中造理惟微振辭有典侍鑿游  
而儼若拱列欽瞻省臺膳以肅如慈宸敦眷四學摠於  
上序百行紀於司成洽乃懿聲被一寰寓建儲之論繫  
先親而是宜立愛之文稽古道而斯順肇膺徽冊有慶



昌辰伏惟尊號皇帝陛下闡長世之善經率保邦之大  
法翁受祕祉備舉縟儀上帝是忱克享於馨茂兆民咸  
賴用致於輯寧惟震長之至賢實乾剛之上體三善靡  
煩於在傳重暉誠契於秉陽陛下仰奉靈心旁挹群籟  
以為主器之重有國莫先矧錫羨於仙源在守成於  
宗躅增崇巨業厲我元良龜馱之告協從神鑑之徵允  
格三讓成魄知天道之好謙明兩作離見皇圖之可大  
式備彌文之禮仍新遵德之稱消以茂辰膺茲鴻典班  
輪飭駕奮五采以相宣碧鏤題宮配二儀而胥求臣以  
濫叨詞職竊守藩封昭數在庭莫覲鸞旌之美含和發  
詠率同鳧藻之誠

進大學衍義表

真希元

伏以汗竹雖塵何補聖經之奧食芹欲獻誤蒙天語之

溫以十年纂輯之餘欣一旦遭逢之幸惟大學設八條  
之教為人君立萬世之程首之以格物致知示窮理乃  
正心之本推之於齊家治國見脩己推及物之原曾子  
之傳獨得其宗程氏以來大明厥旨迨師儒之繼出有  
章句之昭垂臣少所服膺晚而知趣謂淵源遠矣實東  
魯教人之微言而綱目粲然乃南面臨民之要道曩叨  
侍從論思之列適當茲訣蒙蔽之時念將開廣於聰明  
惟有發揮於經術使吾君之心炳如白日於天下之理  
洞若秋毫雖共堯雜進於堯朝豈魑魅能逃於禹鼎不  
量菲薄欲效編摩遽惟三至之讒徒結九重之戀既投  
閑而置散因極意以研精坎而不忘君每倦倦於報上  
藩牆皆置筆幾矻矻以窮年首劄聖賢性命道德之言  
旁采古今治亂安危之迹必提其要皆聚此書凡諸老



先生之講明粗加該括於君子小人之情狀尤極形容  
載瞻海岳之崇深期効消埃之裨補茲蓋恭遇皇帝陛  
下乾旋坤轉日就月將於緝熙單厥心基命適隆於成  
后念終始典于學遜志克邁於商宗方將切瑳琢磨而  
篤於自脩定靜安慮而進於能得事欲明於本末理期  
貫於精粗適粹成編旨塵清燕止其所止願益加止善  
之切新以又新更推作新民之化

元

進三朝實錄表

程文海

一人御極聿嚴金匱之藏三后在天實監玉堂之紀粵  
若稽古克底成書欽惟皇帝陛下孝友慈仁溫文睿哲  
統之垂葉之創念昔繼承功以著德以彰在茲纂錄首  
崇筆削之任式宏龜鑑之圖臣等職忝禁林才非良史  
繫年繫月豈足盡於先朝作莫作謨庶有徵於今日臣  
等以所編成順宗皇帝實錄一卷成宗皇帝實錄五十  
六卷事目十卷制詔錄七卷武宗皇帝實錄五十卷事  
目七卷制詔錄三卷總計一百二十四卷繕寫已畢謹  
具進呈

翰林國史院陞從一品謝表

天開文運治載睹於熙朝地切詞林恩比崇於極品群  
情胥悅斯道增華欽惟皇帝陛下德與日新聖由天縱  
禮儒臣而加異相古所無進院秩以示優自今伊始親  
授銀章之重益為王署之榮臣等學愧前修位隆往代  
典謨訓誥敢忘黼黻之勤元首股肱願效賡歌之盛

謝賜禮物表

吳幼清

接地風雲際會親逢於明主麗天日月照臨遠及於老



臣賜之以府庫之財衣之以筐篚之幣承恩過厚揆分何堪俯瀝愚衷仰塵睿聽伏念臣荊揚賤士樵牧孤蹤幼誦孔氏之遺書無繇見道長值朝家之興運有幸爲民愧碌碌之謏才乏卓卓之奇節以言其文章則體格畢陋以言其學行則器識凡庸自甘晦迹於深山豈覬發身於昭代大鈞靡不覆燾小物亦預陶鎔惟成宗法至元首責立園之隱歷武宗逮延祐游升館閣之華先帝擢之禁林今皇處以經幄講讀古訓對揚耿光謨蒙上聖之簡知得廁群賢而布列然大馬餘齒已非少壯之年而螻蟻微誠莫展驅馳之志外之弗能效勤勞於郡縣內之弗能裨謀議於廟堂縻廩粟費俸錢素餐甚矣辱高位速官謗清論凜然因負采薪之憂遂辭視草之職雖心同葵藿常戀闕庭奈景迫桑榆宜歸田里未嘗

毫釐有補於國況文耄耄無用於時淵度涵容寵錫優渥茲蓋欽遇皇帝陛下乾坤博施海宇皆春忍令散林汨沒於泥塗欲俾寸草沾濡於雨露閱憐周恤固君父惻隱之仁恫款控陳乃臣子辭讓之禮倘冒昧而拜貺實踧踖以懷慙敢致懇祈乞垂矜允收此九重之大惠全其一介之小廉壹是歡榮等如祇受臣栖遲畎畝既難強筋力以輸忠教誨子孫誓當竭精神而報上所賜鈔定段疋除已嚮闕謝恩外未敢欽受謹奉表辭謝以聞

進經世大典表

歐陽原功

堯舜之道載諸典謨文武之政布在方冊道雖形於上下政無間於精粗特於紀錄之間足見彌綸之具是以秦漢有掌故之職唐宋有會要之書予以著當代之設



施于以備將來之考索我國家受命龍朔續休鴻基發  
政施仁行葦之忠厚世積制禮作樂關雎之風化日興  
紀綱具舉於朝廷統會未歸於簡牘欽惟欽天統聖至  
德誠功大文孝皇帝陛下總攬群策躬親萬幾思祖宗  
創業之艱難與天地同功於經緯必有鋪張以揭曠日  
必有述作以藏名山爰命文臣體會要之遺意編勅官  
寺發掌故之舊章倣周禮之六官作皇朝之大典臣某  
叨承旨諭俾綜纂修物有象而事有原質為本而文為  
輔百數十年之治蹟固大略之僅存千萬億世之宏規  
在鴻儒之繼作謹繕寫皇朝經世大典八百八十卷日  
錄十二卷公牘一卷纂修通議一卷裝潢成秩隨表以  
聞伏取進止

賀正日表

劉敏中

曆頒夏正大春秋一統之書禮謹漢儀受圖貢四方之  
賀歡均朝野慶洽天人剛健體元寬仁育物董官常而  
敷聖訓炳如日月之臨恤民隱而降德音翕叶地天之  
泰至和斯應景福維新臣等夙被寵榮忝司端揆無尺  
寸效仰禪財成輔相之功願億萬年永享泮奭優游之  
樂

賀冊后表

楊文郁

聖德日新端齊家以身之本坤元位正備臨軒發冊之  
儀慶溢九重歡騰四表受天成命遵祖詒謀謂王教攸  
基莫若人倫之重然治道之至庶資內治之勤昭法象  
於軒星崇聲明於樹掖以贊嚴宸之孝理以協太母之  
徽音臣等服在近司顯觀盛際道符羲易占順承載物  
之享願擬堯封申富壽多男之祝



賀建儲表

姚登孫

坤元居上挾皇統於中天震器有歸衍孫謀於奕世神人闔憐河岳清寧聖德難名徽音夙著心遊太極兩儀妙玄範之切身佑三朝九鼎重宗磐之勢適春宮之肇建知景命之永延臣等嘉與諸儒欣逢盛典日月啓重光之運幸圍照臨華嵩開萬壽之期惟厯歌頌

車駕班師賀表

李冶

臣某等言伏為逆黨悉平車駕迴鑾者黃鉞耀威果凶徒之一掃翠華旋軫遽明詔之載頒率土皆臣普天同慶伏以周之熙朝而造管叔武庚之役漢之盛世而行淮南濟北之誅事豈樂為兵非不得已屬者遠屬相煽狂童恣行潛包禍心構成內難惟聖人必欲去害肆天子所以有征爰興問罪之師庸示安民之勇靈旗順指醜

類畢燔衣暫試於一戎月連飛於三捷春生秋殺玄化何私天動星迴鴻鈞自幹宗祧鞏固永字無疆之休日月貞明足為群目之用此蓋皇帝陛下運膺千載道貫九皇雄斷電馳廟謨洞徹既多筭以勝小筭況至仁而伐不仁是宜氛祲廓清車書混一大統會歸於中統太平今睹於開平凡在陶甄疇非鼓舞臣某等恭以守官於蕃翰不獲稱慶於闕庭相迎六尺之輿遙祝萬年之壽

進授時曆經曆議表

楊桓

協時正日國政之大端章往考來曆書之明驗一或失應眾所共瞻豈天運之靡常殆人為之未密昔稱作者初匪一家其始也莫不精微未幾則旋聞踈闊蓋由年拘積筭日括周分不知闕測以考真率多傳會以求合



必欲行於永久詎容失之毫釐幸當累洽之辰共仰同  
文之治事加詳覈法貴變通欽惟憲天述道仁文義武  
大光孝皇帝陛下政順陰陽德齊穹壤燭消息盈虛之  
理得裁成輔相之宜爰命文臣若稽乾象畫則考求實  
晷夜則揆度中星察氣朔之後先定躔離之朏朏精思  
密索討本窮原革前人苟簡之規成盛代不刊之典其  
爲要旨具載成書所有授時曆經三卷立成二卷轉神  
注式一十三卷曆議三卷已繕寫成二十一冊隨表上  
進干冒天威不勝惶懼震越之至謹錄奏聞伏候敕旨  
進實錄表  
王暉

英明睿謀果斷爰從潛邸有志斯民植根幹而佐理皇  
綱聘耆聽而講明治道始乎大理再駕長江過化存神  
有征無戰治其龍飛灤水鼎定上都革弊政以惟新擴  
同仁而一視規模先遠朝野清明內則肇建宗祧創設  
臺省修舉政令登崇俊良外則整治師徒申嚴邊將布  
揚威德服蠻羌加以聖無不通明靡不燭守之以勤  
儉朴素養之以慈惠雍和收攬權綱綜數名實賞罰公  
而不濫號令出以惟行萬彙連茹群雄人設削平下土統  
正中邦慕義鸞風聲教實朔南之暨梯山航海職貢無  
遐邇之殊方且開學校而勸農桑考制度而興禮樂國  
號體乾坤之統書畫煥奎璧之文罄所有而醜戰功不待  
計而救民乏聽言擇善明德綏刑斂福錫民遇災知懼  
得洪範惟皇之理過周宣修政之勤以致時和歲豐民



安吏職蓋帝德克周於廣運故至公均被以無方可謂  
文致太平武定亂略繼一祖四宗之志兼二皇五帝之  
功開天立極者三十五年立經陳紀者二萬餘事以謙  
讓弗違於備紀故纂修未至於成書欽遇皇帝陛下寅  
紹詒謀厲精圖治亟鑑觀於成憲思通駿於先聲深詔  
下臣俾為實錄宅心宗祏疑孝羹墻開館局而增置官  
僚敕群司而大紬圖籍編摩既富搜訪加詳來擬於  
時政之編參取於起居之注張皇初藁增未見於罕聞  
承奉綸音俾蠲繁而就簡俯殫管見仰體震衷盡略虛  
文一存實事其饗會征伐文物典章粲焉列三代之英  
蔚爾開萬世之業與夫才德孝廉之士忠良姦佞之臣  
版圖生齒之繁財賦畜牧之盛謹依條據粗致無遺今  
具所修成世祖皇帝實錄二百一十卷事目五十四卷  
聖訓六卷凡二百七十卷謹繕寫為二百七十帙用黃  
綾夾復封今隨表上進 等忝備台司幸膺盛典顧惟  
載筆不何有於三長勉進蕪辭慮庶幾於一得冒瀆聖  
聽不勝驚惶

經筵官進職謝恩表

虞伯生

聖作稽古知崇效天開筵肆講於前經當宁屢煩於明  
詔垂憲萬世一新經緯之文有臣十人並拜便蕃之賜  
獨興睿斷創始明時伏惟昔者明王不以天縱而自聖  
本之先括式資道揆以開人故伏羲則畫於河圖神禹  
錫疇於洪範凡將圖治慎在求聞蓋帝王傳授之精布  
乎方冊而古今治亂之迹可以鑑觀爰咨傳洽之材用  
廣聰明之識然守職業者特見諸政事之著惟事啓沃  
者先端其心術之微故茲曠典之行實重真儒之寄必



經業可以發聖賢之蘊必器能可以相禮樂之成必養德之全素蒙孚信必至誠之積可致感通苟非其人不得茲選而臣等性本固陋學尤迂踈守其師說之遺僅不忘其章句及轉國人之譯組可達其性情所謂材有限而道無窮心欲言而口不逮猶重昔人之嘆况乎臣等之愚是故設醴上尊敷醢廣厦既極詢諮於累歲蒞聞補報之微切敢謂能自得師坐而進道更錫官聯之重俾專誦說之司雖竊恩榮愈增憂責茲蓋伏遇皇帝陛下以乾坤之德為德以堯舜之心為心無一念不在於民生無一事不遵於祖憲遐方畢服猶虞水旱之為災群賢在朝尚恐俊良之攸伏必合一帝三王之至盛以登四方萬國之太平下收瓊末於芻蕘俾益涓埃於山海臣等敢不力循古訓各盡微衷非先王之法不敢言冀必由於正路雖末世之舉不敢避庶有戒於前車尚勸九歌用稱萬壽

賀正日表

陽春發育明新若日之方中正朔會同溥博如天之為大顯承盛化協慶昕庭神武成功至文備德綜萬機而益裕達四聰而弗遺禮樂從容建用維皇之極圖書宣朗緝熙於穆之純假郊廟以受釐率臣民而錫福臣等叨陪鼎鉉式贊鈞陶時和歲豐願保無疆之祚風淳俗美永歌有道之朝

賀親祀南郊表

謝端

四方于理事天致恭己之誠三年而郊卜日叶用辛之吉功成治定禮備樂和端拱無為純一不二肇舉明禋之典載嚴升配之文大呂黃鍾音協雲門之奏鎮圭縹



藉輝聯蒼璧之華祥風和氣之與游景星慶雲之疊見  
穹示集貺宗社蒙休臣等叨佐清朝欣觀熙事列園壇  
之八陛幸陪漢時以侍祠陳泰階之六符願舉兒觴而  
上壽

賀親祀太廟表

盧亘

九重御極太平端拱於中天萬舞奏庭盛禮告成於清  
廟群方胥贊百辟交孚剛健日新聰明時憲祖有功宗  
有德衍歷歷服之無疆車同軌書同文底烝民之作乂  
袞冕華昭於日月笙鏞和協于神人崇億載之洪基舉  
累朝之曠典臣等忝司政府肅侍齊宮邊豆駿奔仰宣  
室受釐之慶衣冠稱賀效華封祝聖之誠  
國朝

國子學賀登

極表

蘇伯衡

寶曆在躬應千齡之

上聖瑤圖啓運得百姓之驩心臨御云初謳歌爲盛欽  
惟

皇帝陛下聰明天縱剛健日新仗尺劍以定群雄道符  
漢祖歷一紀而成大業切邁唐宗陶匏爾粟以感祀而  
上帝時歆詩書禮樂以造士而下民祗若風行雷動敷  
治象於多方春育海涵播仁聲於庶類仰正統之誕紹  
知景命之永延凡在生成罔不慶賴臣等獲覩鉅典幸  
際昌期車同軌書同文行同倫致治恭陳於善頌黨有  
庠術有序國有學敷言願贊於成能臣等無任瞻

天仰

聖激切屏營之至謹奉表稱賀以  
聞



代佛郎國進天馬表

王律

乾龍在御適觀至治之期天馬來廷謹效遐方之貢敢  
彈舟車之重譯恭伸臣妾之微誠中謝竊以榮水負圖  
曾見羲皇之世渥注毓秀載聞漢帝之時必有聖明庶  
膺嘉貺矧值重熙之運宜昭上瑞之符伏念臣化外窮  
邦海濱僻壤種分夷裔遐居西域之西心慕華風引領  
北辰之北豈登天之無路每就日以瞻輝幸此名駒可  
充方物雖匪望雲之質亦稱絕地之姿歷無草之流沙  
驅馳萬里備六飛之法駕警蹕九重前鸞旗而後屬車  
觀玉臺而游閭闔儼沐至尊之寵馭實增小節之榮光  
輒遣陪臣冒干典屬此蓋伏遇恩加九有<sub>有道合三無舞</sub>  
干羽于兩階誕敷文德執玉帛者萬國共為帝臣異區  
並獻於白狼休應嘗符於朱鳳周邦來賀盡歸履燾之

中岐道有夷孰在要荒之後臣禮慚輸費意切戴盆大  
二統於輿圖永固無為之化協六律於樂府宁聞太乙  
之歌

謝恩表

解摺

太祖皇帝實錄告成蒙

恩賜臣等白金綵幣衣服鞍馬加賜筵宴謹奉表稱謝  
伏以史冊光華紀載  
聖神之實惠

睿恩錫類誕敷雨露之均恩是知達孝愛其所親至仁  
不擇所施欽惟

與天同運如日之升至孝為天所相而謂孝  
莫先於顯揚至仁為眾所歸而謂仁莫大於尊親爰自  
君臨大寶之初即下脩史之詔兢業萬幾之暇不忘開



卷之勤臣等繆悠末學承命惶悚日覩聖明之事手授  
傳信之編鑿坡螭陞之書無庸黼黻石室金縢之秘不  
費討論但日食大官之膳又時承異數之褒雖盡力於  
暮年實無加於毫末者也茲者編次成書伏闕上進  
恩榮稠疊漸懼交并錫以天閑之駟馬頒之內帑之金  
帛榮及其家衆足其用錦服焜煌照耀都成之耳目華  
筵沾醉驪騰士庶之榆揚臣縉等省已無勞服膺莫報  
聖壽齊天一經行世幸附姓名於不朽仰惟日月之長存  
駕幸太學謝恩表  
胡儼

伏以昭德用中立百王之大法崇儒重道闡千載之宏  
規

綸音渙發乎

九重士氣幸增於六館懽均朝野慶洽天人恭惟

濬拓温恭剛健中正仁義同於堯舜智勇邁

於禹湯闕里詩書仰先師之如在寰區聲教啓後學於

無窮爰遵太祖之舊章肇稱昭代之殷禮

鑿輿幸于璧水縉紳圜於橋門惟君惟師以教以食衣

冠之美邊豆之序秩秩乎有容鼓鍾之音絃誦之聲洋

洋乎盈耳自唐虞三代以來未有盛於今日者也臣儼

等忝職成均叨承寵遇敷言是訓永依日月之光華造

士登崇願效消塵之補報無任瞻

天仰

聖激切屏營之至謹奉表稱謝以

聞

進書表

胡廣

伏以六經之道昭如日星經緯乎天地貫徹乎古今放



之則彌六合卷之則退藏於密用之於身而身脩行之  
於家而家齊推之於國而國治施之於天下而天下平  
蓋世必窮經而後道明未有舍經而能治理者也是以  
聖王垂憲必資道以開人賢拓肇基必稽古以作範故  
伏羲則河圖而演畫大禹因洛書而錫疇孔子刪詩書  
脩春秋寓一王之法周公陳王業制禮樂弘百世之規  
况乎精一執中之傳尤重丁寧告戒之旨如斯顯迹照  
然可觀自王道既衰異說蠱起熒烈秦火之餘穿鑿漢  
儒之弊其間存者不絕如絲莫能究其指歸一切趨於  
苟且夤緣故習鮮克正之於乎聖人之道不行而百世  
無善治聖人之學不傳而千載無真儒遂令往微之難  
尋益發前脩之未歎夫否必有泰晦必有明繇夫濂洛  
關閩之學興而後堯舜禹湯之道著悉埽蕪蕪之蔽大

開正學之宗不幸屢阨狂言既揚復抑又因循數百年  
之間卒莫能會其說于一蓋必有待於今日者矣

天啓

聖明誕膺景運

太祖高皇帝天縱之聖以武功定天下以文教興太平  
首建學校頒

賜書籍作養人材茂隆政治四海內外翕然同風欽惟  
皇帝陛下文武聖神聰明睿知續承大統紹述鴻勳成  
功盛德雖三皇而無以加事業文章與二儀而同其大  
治已至而猶以爲未至功已成而猶以爲未成體道謙  
冲遊心高遠乃者渙起

宸斷脩輯六經恢拓道統之源流大振斯文之委靡發  
舒幽蹟鉤纂精玄博采先儒之格言以爲前聖之輔翼



合衆途於一軌會萬理於一原地負海涵天晴日曠以是而興教化以是而正人心使夫已斷不續之墜緒復屬而復聯已晦不明之蘊緼復彰而復著肇建自古所無之制作續述自古所無之事功非惟備覽於經筵實欲頒布於天下俾人皆由於正路而學不惑於他岐家孔孟而戶程朱必獲真儒之用佩道德而報仁義咸趨聖域之歸頓回太古之淳風一洗相公之陋習煥然極備倚歎盛哉竊嘗觀之周衰道廢汲汲皇皇以斯道維持世教者惟師儒君子而已未有大有為之君能倡明六經之道紹承先聖之統如今日者此

皇帝陛下所以卓冠百王超越千古者也臣廣等一介書生粗知章句大學賢關渾未造其闢奧圓冠句屢固慚列於章縫幸逢熙洽之時謬忝校勘之任每受成於指教亦何假於施爲樂覩就編豈勝歡慶與天下而同惠於萬古而有光尊所聞行所知求不負於教育正其誼明其道期補報於昇平無任瞻天仰聖激切屏營之至謹奉表隨進以聞

經筵謝表

楊士奇

伏以天清地寧昭聖皇之統御時康道泰美文治之隆興日月光華中外忻悅恭惟

皇帝陛下聰明睿智廣大寬仁尊尊親親崇兩宮之至養推恩布德得四海之懽心是以三光全而寒暑平五穀熟而人民育益勤稽古之學益弘養正之



功謂易書詩禮春秋之文皆堯舜禹湯文武之道萬幾  
有暇恒

親御於經筵多聞是求肆詳延於儒雅用資啓沃用致  
進脩上以承帝王心法之傳下以錫臣民皇極之福光  
祖宗之洪業擴海宇之隆平臣某等猥以庸才咸叨榮  
命荷絲綸之節勵繼宴錫之駢蕃於緝熙單厥心允協  
周成之德念終始典于學敬陳商說之篇

大明一統志表

李賢

伏以日月照臨誕啓大明之運乾坤覆載咸歸一統之  
尊民物阜康人文宣朗匪表章於今日曷垂示於將來  
粵昔虞代幅員備存禹貢周家疆域悉著職方惟敷土  
經野之詳故享國歷年之久降自炎漢下逮胡元志地  
理者數百家紀方輿者累千卷若非泛而弗切則或略

而未明於是厘

聖祖之至情念輿圖之重事爰命儒以纂集冀成書以  
鋪張博采雖周全功未究時如有待事豈偶然恭惟  
皇帝陛下剛健欽文聰明英武重華協

帝已臻盛治於前申命自

天復續洪圖於後志兼隆於千古勤獨斷於萬幾凡聖  
賢經世之圖咸留 睿覽於

祖宗待成之志尤軫淵衷肆宵旰之靡遑益繼述之是  
務顧惟重熙累洽千載一時自

天命之有歸祚

皇明之撫運德與地而兼廣化與天而同流尊親無間  
於華夷功烈獨超乎先後必有 盛製以闡 不休特  
簡文學之臣付以纂脩之任而



皇猷高遠

聖學淵微渙發

綸音豫爲指授於凡經書所載或在  
網羅至若子史所傳舉當收采宜加參考以正信疑是  
非必有據依以立義類凡列表京師爲四方之極列  
方岳爲諸郡之綱疆域必繫於九州分野悉稽乎列宿  
形勝風俗錄奚遠邇之分物產山川載靡小大之間藩  
封著維城之固公署嚴禦侮之威書學校書院以重育  
賢書宮室關梁以昭資世信方來則寺觀祠廟之兼錄  
鑑已往則陵墓古蹟之並存述宦蹟備舉夫諸司取人  
才不遺於一善列女彰節行之異仙釋見方技之奇文  
須省而意則該實足徵而名不爽欲使宇宙數萬里之  
外不出戶而可知庶幾上下千百年之閒一舉目而畢  
見豈徒備一時之廣覽將以垂萬世之宏規此誠

皇上經天緯地之文足以顯繼志述事之孝而光前振  
後者也臣等章句腐儒草茅迂士叨承委任忝效編摩  
奈海宇廣大而難窮兼簡用浩繁而莫究顧茲踈淺寧  
免漏遺雖殫鉛槧之勞尚慮豕魚之混仰睿謨之啓

發幸編簡之克完冀垂宥於含弘願少供於清燕道配

天德配地八荒咸囿於生成車同軌書同文一統未傳

於悠久無任瞻

天仰

聖激切屏營之至謹奉表隨進以

聞



文翰類選大成卷第一百四十二

文翰類選大成卷第一百四十三箋目錄

魏

繁休伯 一道

吳季重 一道

楊德祖 一道

陳孔璋 一道

晉

阮嗣宗 一道

梁

謝玄暉 一道

唐

柳子厚 一道

元

虞伯生 一道

楊文郁 一道

夾谷之奇 一道

袁伯長 一道



國朝

胡儼 一道

文翰類選大成卷第四百十三 箋目錄

文翰類選大成卷第四百十三

左長史上海李伯輿編輯

紀善慈谿馮厚校正

箋類

魏

與魏文帝箋

繁休伯

名欽 穎川人 丞相主簿

正月八日壬寅領主簿欽死罪死罪近屢奉箋不足自  
宣頃諸鼓吹廣求異妓時都尉薛訪車子年始十四能  
喉轉引聲與笳同音白上呈見果如其言即日故共觀  
試乃知天壤之所生誠有自然之妙物也潛氣內轉哀  
聲外激大不抗越細不幽散聲悲舊笳曲羨常均及與  
黃門鼓吹溫胡迭唱迭和喉所發音無不響應曲折沈  
浮尋變入節自初呈試中聞二句胡欲傲其所不知尚



之以一曲巧竭意置既已不能而此孺子遺聲抑揚不可勝窮優游變化餘弄未盡暨其清激悲吟雜以怨慕詠北狄之遐征奏胡馬之長思悽入肝脾哀感頑豔是時日在西隅涼風拂柱背山臨溪流泉東逝同坐仰歎觀者俯聽莫不泣泣隕涕悲懷慷慨自左驥史妣塞姐名倡能識以來耳目所見僉白詭異未之間也竊惟聖體兼愛好奇是以因箋先白委曲伏想御聞必含餘懼冀事速訖旋侍光塵寓目階庭與聽斯調宴喜之樂蓋亦無量欽死罪死罪

答魏太子箋

吳季重

名質齊陰人  
振威將軍

二月八日庚寅臣質言奉讀手命追亡慮存恩哀之隆形於文墨日月冉冉歲不與我昔侍左右廁坐衆賢出有微行之游入有管絃之歡置酒樂飲賦詩稱壽自謂

可終始相保並騁材力効節明主何意數年之間死喪略盡臣獨何德以堪父長陳徐劉應才學所著誠如來命惜其不遂可為痛切凡此數子於雍容侍從實其人也若乃邊境有虞群下鼎沸軍書輻至羽檄交馳於彼諸賢非其任也往者孝武之世文章為盛若東方朔枚臯之徒不能持論即阮陳之儔也其唯嚴助壽王與聞政事然皆不慎其身善謀於國卒以敗亡臣竊恥之至於司馬長卿稱疾避事以著書為務則徐生庶幾焉而今各逝已為異物矣後來君子實可畏也伏惟所天優游典籍之場休息篇章之圃發言抗論窮理盡微擗藻下筆鸞龍之文奮矣雖年齊蕭王才實百之此衆議所以歸高遠近所以同聲也然年歲若墜今質已四十二矣白髮生贖所慮日深實不復若平生之時也但欲保



身勅行不蹈有過之地以為知己之累耳游宴之歡難  
可再遇盛年一過實不可追臣幸得下愚之才值風雲  
之會時邁齒戴猶欲觸芻奮首展其割裂之用也不勝  
悽悽以來命備悉故略陳至情質死罪死罪

在元城與魏太子箋

臣質言前蒙延納侍宴終日曜靈匿景繼以華燈雖虞  
卿適趙平原入秦受贈千金浮觴旬日無以過也小器  
易盈先取沈頓醒寤之後不識所言即以五日到官初  
至承前未知深淺然觀地形察土宜西帶恒山連岡平  
代北鄰栢人乃高帝之所忌也重以泚水漸漬疆宇喟  
然歎息思淮陰之奇譎亮成安之失策南望邯鄲想廉  
藺之風東接鉅鹿存李齊之流都人士女服習禮教皆  
懷慷慨之節包左車之計而質闇弱無以蒞之若乃邁

德種恩樹之風聲使農夫逸豫於疆畔女工吟詠於機  
杼固非質之能也至於奉遵科教班揚明令下無威福  
之吏邑無豪俠之桀賦事行刑資於故實抑亦慄慄有  
庶幾之心往者嚴助釋承明之歡受會稽之位壽王去  
侍從之娛統東郡之任其後皆克復舊職追尋前軌今  
獨不然不亦異乎張敞在外自謂無奇陳咸憤積思入  
京城彼豈虛談夸論誑曜世俗哉斯實薄郡守之榮願  
左右之勤也古今一揆先後不質焉知來者之不如今  
聊以當觀不敢多云質死罪死罪

答臨淄侯箋

楊德祖

名脩曹操子

脩死罪不侍數日若彌年載豈由愛顧之隆使係仰之  
情深耶損辱嘉命蔚矣其文誦讀反覆雖諷雅頌不復  
過此若仲宣之擅漢表陳氏之跨冀域徐劉之顯青豫



應生之發魏國斯皆然矣至於脩者聽采風聲仰德不暇自周章於省覽何遑高視哉伏惟君侯少長貴盛體發旦之資有聖善之教遠近觀者徒謂能宣昭懿德光贊大業而已不復謂能兼覽傳記留思文章今乃舍王超陳度越數子矣觀者駭視而拭目聽者傾首而竦耳非夫體通性達受之自然其孰能至於此乎又嘗親見執事握牘持筆有所造作若成誦在心借書於手曾不斯須少留思慮仲尼日月無得踰焉脩之仰望殆如此矣是以對鷦而辭作暑賦彌日而不獻見西施之容歸憎其貌者也伏想執事不知其然猥受顧錫教使刊定春秋之成莫能損益呂氏淮南字直千金弟子拊口市人拱手者賢聖卓犖固所以殊絕凡庸也今之賦頌古詩之流不更孔公風雅無別耳脩家子雲老不曉事疆著一書悔其少作若此仲山周旦之疇為皆有譽耶君侯忘聖賢之顯迹述鄙宗之過言竊以為未之思也若乃不忘經國之大美流千載之英聲銘功景鍾書名竹帛斯自雅量素所蓄也豈與文章相妨害哉輒受所惠竊備矇眵誦詠而已敢望惠施以忝莊氏季緒瓌瓌何足以云反荅造次不能宣備脩死罪死罪

荅東阿王箋

陳孔璋

琳死罪死罪昨加恩辱命并示龜賦披覽粲然君侯體高俗之羽秉青萍干將之器拂鐘無聲應機立斷此乃天然異稟非鑽仰者所庶幾也音義既遠清辭妙句焱絕煥炳譬猶飛兔流星超山越海龍驤所不敢追况於駑馬可得齊足夫聽白雪之音觀綠水之節然後東野巴人蚩鄙益著載懼載笑欲罷不能謹韞櫝玩耽以為



吟頌琳死罪死罪

晉

為鄭冲勸晉王箋

阮嗣宗

冲等死罪伏見嘉命顯至竊聞明公固讓冲等眷眷實有愚心以為聖王作制百代同風褒德賞功有自来矣昔伊尹有莘氏之媵臣耳一佐成湯遂荷阿衡之號周公籍已成之勢據既安之業光宅曲阜奄有龜蒙呂尚磻磻之漁者一朝指麾乃封營丘自是以來功薄而賞厚者不可勝數然賢拓之士猶以為美談况自先相國以來世有明德翼輔魏室以綏天下朝無闕政人無謗言前者明公西征靈州北臨沙漠榆中以西望風震服羌戎東馳迴首內向東誅叛逆全軍獨尅禽闔閭之將斬輕銳之卒以萬萬計威加南海名懾二越宇內康寧

苛愿不作是以殊俗畏威東夷獻舞故聖上覽乃昔以來禮典舊章開國光宅顯茲太原明公宜承聖旨受茲介福允當天人元功盛勲光光如彼國土嘉祚巍巍如此內外協同靡侮靡違由斯征伐則可朝服濟江掃除吳會西塞江源望祀岷山迴戈弭節以麾天下遠無不服彌無不肅大魏之德光于唐虞明公盛勲超于桓文然後臨滄洲而謝文伯登箕山以指許由豈不盛乎至公至平誰與為鄰何必勤勤小讓也哉冲等不通大體敢以陳聞

梁

拜中軍記室辭隨王箋

謝玄暉

故使文學謝眺死罪死罪即日被尚書召以眺補中軍新安王詔室參軍眺聞潢汙之水願朝宗而每竭鴛蹩



之乘希沃若而中疲何則臯壤搖落對之惆悵岐路西  
東或以嗚嗚乃服義徒擁歸志莫從邈若墜雨翩似秋  
帶眺實庸流行能無算屬天地休明山川受納褒采一  
介抽揚小善故捨耒場圃奉筆兔園東亂三江西浮七  
澤契闊戎旃從容燕語長裾日曳後乘載脂榮立府庭  
思加顏色沐髮晞陽未測涯涘撫臆論報早誓肌骨不  
寤滄溟未運波臣自蕩渤澥方春旅翮先謝清切藩房  
寂寥舊草輕舟反溯弔影獨留白雲在天龍門不見去  
德滋永思德滋深唯待青江可望候歸艎於春渚朱郎  
方開放蓬心於秋實如其簪履或存衽席無改雖復身  
填溝壑猶望妻子知歸攬涕告辭悲來橫集不任犬馬  
之誠

百辟勸進奉箋

近以朝命蘊策冒奏丹誠奉被還命未蒙虛受措紳顯  
顯深所未達蓋聞受金於府通人之弘致高蹈海隅匹  
夫之小節是以履乘石而周公不以爲疑增玉璜而太公  
不以爲讓況世拓繼軌先德在民經綸草昧歎深微管  
加以朱方之役荊河是依班師振旅大造王室雖累爾  
救宋重賦存楚以今觀古曾何足云而惑甚盜鍾功疑  
不賞皇天后土不勝其酷是以玉馬駿奔表微子之去  
金版出地告龍逢之怨明公據鞍 輟哭厲三軍之志  
獨居掩涕激義士之心故能使海若登祗罄圖郊社山  
戎孤竹束馬景從伐罪弔民一匡靖亂匪叨天功實勤  
濡足且明公本自諸生取樂名教道風素論坐鎮雅俗  
不習孫吳遵茲神武驅盡誅之氓濟必封之俗龜玉不  
毀誰之功歟獨爲君子將使伊周何地某等不達通變



實有愚誠不任恠款悉心重謁伏願時膺典冊式副民望

唐

賀皇子箋

柳子厚

宗元惶恐言伏奉六月七日制元和聖文神武法天應道皇帝况受徽號率士臣子歡抃無涯伏惟皇太子殿下麗正居中輔成昌運消伏沴孽贊揚輝光鴻名允升大慶周洽表文武之經緯著天道之運行瑞景照臨示重輪之發耀恩波下濟見少海之增瀾宗元忝守遐方獲聞盛禮躍踴之至倍萬恒情謹附箋賀宗元惶恐死罪死罪

元

賀正日箋

虞伯生

玉燭調元播陽春於萬物禕衣乘翟奉景福於一人權溢宮闈慶延宗社柔嘉維則博厚無疆帝業中興五色鍊補天之石女切內治七襄成報日之章膺瑤冊之穠華銜金支之奕葉茂迎蒼曆益介洪禧某等備位外廷稱觴前殿二南風化歌關睢正始之音萬年室家樂既醉太平之運

賀千秋箋

楊文郁

陽常居於太夏方收養毓之功震一索為長男載啓亨嘉之會慶鍾甲觀歡溢寰區克拓克明允文允武春坊翊善茂隆邦本之貞曉寢問安長奉天顏之喜茲臨彌月之節宜膺百順之詳臣等竊備詞官進趨庭賀幸聞樂府奉重暉重潤之章請合輿情上俾熾俾昌之壽

賀正日箋

夾谷之奇



位拱少陽仗簇黃麾之曉氣暄太簇祥開青禁之春邦  
本益隆輿情胥慶仰遵聖訓參決政機執中傳精一之  
心作貳毓元良之望重明繼照陰邪常遏於未形九四  
在淵陽德克潛於已著茲履端之云始宜介福之孔多  
某等素乏長材叨居端尹星輝海潤莫酬沾被之恩月  
恒日光第祝繇延之筭

賀千秋箋

袁伯常

心依宸極前星耀於明堂卯為春門大電環于甲觀盛  
德集福至和儲祥體仁法元師古合道温恭事帝密輔  
相以生成問學積躬益緝熙而光大疇咨黃髮之彥庸  
作青闈之規茂對誕辰宜膺純嘏某等肅瞻儲禁忝職  
詞林鶴駕陳儀喜承顏於兩殿鴻圖衍慶願介壽於千  
秋

國朝

駕幸太學謝

東宮箋

胡儼

伏以  
泰運

天開值千載亨嘉之會前星象著輔 九重禮樂之儀  
儒術光華士林忻忭敬惟

緝熙聖學參決政機侍膳問安恭待

龍樓之曉論經講道宏開鶴禁之春當鑿輿躬幸

於璧雍正邦本恪勤於翼戴文風丕振

睿德益隆舍菜禮成觀明時之大典園橋雲集藹首

善之榮觀巨儼等忝列儒流親逢盛事立諸生於館下

願咸陳雅頌之童貢多士於

朝端期永樂雍熙之治無任瞻仰激切屏營之至謹奉



聞 繁稱謝以

文翰類選大成卷第一百四十三

文翰類選大成卷第一百四十四啓目錄

梁

任彦升 三道

唐

韓退之 二道

柳子厚 二道

杜牧之 一道

劉太真 一道

元微之 一道

宋

王介甫 二道

蘇子瞻 一道

元

唐擘 一道

閻子靜 一道

文翰類選大成卷第一百四十四啓目錄



文翰類選大成卷第一百四十四

左長史上海李伯璵編輯

紀善慈谿馮厚校正

啓類

梁

奉答勅示七夕詩啓

任彦升

臣昉啓奉勅并賜示七夕五韻竊惟帝迹多緒俯同不一託情風什希世罕工雖漢在四世魏稱三祖寧足以繼想南風克諧調露性與天道事絕稱言豈其多幸親逢旦暮臣早奉龍潛與賈馬而入室晚屬天飛比嚴徐而待詔惟君知臣見於納言之旨取求不疵表於辯才之戲謹輒牽率庸陋式謝天獎拙速雖效蚩鄙已影臨啓輒而圖識所實謹啓



為卞彬謝脩卞忠貞墓啓

臣彬啓伏見詔書并鄭義泰宣勅當賜脩理臣亡高祖  
晉故驃騎大將軍建興忠貞公壺墳塋臣門緒不昌天  
道所昧忠構身危孝積家禍名教同悲隱淪惆悵而年  
世賢遷孤裔淪塞遂使碑表蕪滅立樹荒毀狐兔成穴  
童牧哀歌感慨自哀日月纏迫陛下弘宣教義非求效  
於方今壺餘烈不泯固陳力於異世但加等之渥近闕  
於晉典樵蘇之刑遠流於皇代臣亦何人敢謝斯幸不  
任悲荷之至謹奉啓以聞謹啓

上蕭太傅固辭奪禮啓

昉啓近啓歸訴庶諒窮款奉被還旨未垂哀察悼心失  
圖泣血待旦昉於品庶示均鎔造于祿所榮更為自拔  
虧教廢禮豈關視聽所不忍言具陳茲啓昉往從未宜

祿不代耕飢寒無甘旨之資限役廢晨昏之半膝下之  
歡已同過隙几筵之慕幾何可憑且奠酌不親如在安  
寄晨暮寂寥間若無主所守既無別理窮咽豈及多喻  
明公功格區宇感通有塗若霈然降臨賜寢嚴命是知  
孝治所被爰至無心錫類所及匪徒教義不任崩迫之  
情謹以啓事陳聞謹啓

唐

上鄭尚書啓

韓退之

愈啓伏蒙仁恩猥賜示問感戴戰悚若無所容措然尚  
有厥誠須盡露於左右者敢避其煩黷懷不滿之意於  
受恩之地裁愈幸甚三得為屬吏朝夕不離門下出入  
五年竊自計較受與報不宜在門下諸從事後故事有  
當言未嘗敢不言有不便於已輒吐私情閣下所宜憐



也分司郎官職事惟祠部為煩且重愈獨判二年日與  
宦者為敵相伺候罪過惡言詈辭狼籍公牒不敢為恥  
實慮陷禍故前者懷狀乞與諸郎官更判意雖甚專事  
似率爾言語精神不能自明不蒙察允遽以慙歸飽俛  
日日遂踰累旬私圖其宜敢以病告鵬鳩平均歌於國  
風從事獨賢推以怨刺伏惟更加憐察幸甚幸甚愈再拜

上鄭留守啓

愈啓愈為相公官屬五年辱知辱愛伏念曾無絲毫事  
為報荅效日夜思慮謀畫以為事大君子當以道不宜  
苟且求容悅故於事未嘗敢疑惑宜行則行宜止則止  
受容受察不復進謝自以為如此真得事大君子之道  
今雖蒙沙汰為縣固猶在相公治下未同去離門墻為  
故吏為形迹嫌疑改前所為以自疎外於大君子固當

不待煩說於左右而後察也人有告人辱罵其妹與妻  
為其長者得不追而問之乎追而不至為其長者得不  
怒而杖之乎坐軍營操兵守禦為留守出入前後驅從  
者此真為軍人矣坐坊市賣餅又稱軍人則誰非軍人  
也愚以為此必姦人以錢財賂將吏盜相公文牒竊注  
名姓於軍籍中以陵駕府縣此固相公所欲去奉法吏  
所當嫉雖捕繫杖之未過也昨問相公追捕所告受辱  
罵者愚以為大君子為政當有權變始似小異要歸於  
正耳軍吏紛紛入見告屈為其長者安得不小致為之  
之意乎未敢以此仰疑大君子及見諸從事說則與小  
人所望信者少似乖戾雖然豈敢生疑於萬一必諸從  
事與諸將吏未能去朋黨心蓋覆黥黥不以真情狀白  
露左右小人受私恩良久安敢閉蓄以為私恨不一二



陳道伏惟相公憐察幸甚幸甚愈無適時不用漸不喜  
為吏得一事為名可自罷去不啻如棄涕唾無一分顧  
藉心願失大君子纖芥意如丘山重守官去官惟今日  
指揮愈惶懼再拜上

上裴晉公啓

柳子厚

宗元啓伏以周漢二宣中興之業歌於大雅載在史官  
然而申甫作輔方召專淮夷之功魏邴謀暮辛趙致罕  
羌之績文武所注中外莫同伏惟相公天授皇家聖賢  
克合謀叶德一以致太平入有申甫魏邴之勤出兼方  
召辛趙之事東取淮右北服恒陽略不代出功無與讓  
故天下文士皆願秉筆牘勤思慮以贊述洪烈闡揚大  
勲宗元雖敗辱斥逐守在蠻裔猶欲振發枯槁決疏潢  
汙罄效蚩鄙少佐毫髮謹撰平淮夷雅二篇恐懼不敢  
進獻私願徹聲問于下執事庶宥罪戾以明其心出位  
僭言惶戰交積無任踴躍屏營之至不宣宗元謹啓

上李中丞啓

宗元啓宗元無異能獨好為文章始用此以進終用此  
以退今者畏罪悔咎伏匿惴慄猶未能去之時時舉首  
長吟哀歌舒泄幽鬱因取筆以書紉章而編略成數卷  
伏念閣下以文章昇大僚統方隅而宗元幸緣罪辜得  
與編人齒於部內不以此時露其所為以希大君子顧  
視則為陋劣而自棄也敢飾近文及在京師官命所草  
者凡三卷合四十三卷不敢繁故也倘或以為有可采  
者當繕錄其餘以增几席之汚去就鄙野伏用兢惶謹啓

上李太尉論北邊事啓

杜牧之

某啓伏以聖主垂衣太尉當軸威德上顯和澤下流諸



侯無異心百姓無怨氣星辰順靜日月光明天業益昌  
聖統無極既功成而理定實道尊而名垂今則未聞縱  
東山之遊樂後園之醉惕惕若不足兢兢而如無豈不  
以邊障尚驚殊虜未殄防其入寇猶須徵兵伏以迴鶻  
種落人素非多校於突厥絕為小弱今者國破眾叛逃  
來漢南為羈旅之魂食草萊之實白髮驪驛之騎凋耗已  
無漣酪皮毳之資饑寒皆盡寄命雜種藏迹陰山取之  
及時可以一戰今者度虜之不出者有二時去時來徊  
翔不決必有所在西戎已得要約伺其氣勢同為侵擾  
此其一也心膽破壞馬畜殘少且於羨水豐草暖日廣川  
牧馬養習以俟強大此其二也今者徵中國之兵與之  
首尾又戍則有師老費財之憂深入則有大寒瘕墮之  
苦示戎狄之弱生姦傑之心今者不取恐貽後患敢以

管見上干尊重自兩漢伐虜皆是秋冬不過百日驅中國  
之人入苦寒之地此時匈奴勁弓折膠童馬免乳畜肥  
草壯力全氣盛與之相校勝少敗多故匈奴云漢實大  
國也但其人不能辛苦爾此所謂避虛而繫實逃短而  
攻長至於後魏崔浩因見其理蠕蠕強盛屢犯北邊浩  
請討之曰蠕蠕恃其地遠自寬已久故夏則散眾放畜  
秋乃背寒向暄南來寇抄今出其慮表掩其不備大兵  
卒至必驚駭星分向塵奔走牡馬護牧牝馬戀駒驅馳  
難制不得水草未過數日則聚而困斃可一舉而滅矣  
武帝從之及全軍入境蠕蠕先不設備民畜布野驚怖  
四奔莫相攻攝於是分軍撲討東西五千里南北三千  
里凡所俘虜及獲畜產彌漫山澤高車因殺蠕蠕種類  
歸降者三十餘萬落虜遂散亂帝沿弱水西行至涿邪



山諸大將慮深入恐有伏兵勸帝停止不追浩先勸窮  
追之不從後聞涼州賈胡言若更前行三日則盡滅之  
矣帝深恨之以其所見今若以幽并突陣之騎酒泉教  
射之兵整飭誠誓仲夏潛發計陰山與涿邪之遠近十  
不一二校蠕蠕迴鶻之強弱猶如虎鼠五月節氣在中  
夏則熱到陰山尚寒中國之兵足以施展行軍於枕席  
之上翫窟於掌股之中軌輻懸鉞湯沃覘雪一舉無類  
必然之策今冰合防秋冰銷解戍行之已久虜為長然  
出為意外實為上策議者或云北取黠戛今討迴鶻伏  
以黠戛起於別種超為可汗必是英傑天時必助賢材  
必用法令必明滅迴鶻之後便是勅敵况示之以弱必  
為所輕今者四海九州同風共貫諸侯用命年穀豐熟  
可以瘞玄王於常山子遺人於河壠顧茲疲虜豈遺子

孫伏惟太尉相公文德素昭武功復著畫地而兵形盡  
見按璫而邊事無遺唯一指蹤即可掃迹昔漢武帝求  
賢也有上書不足採者輒報罷去未嘗罪之故能羈越  
臣胡大興禮樂今太尉與仁聖天子同德有志之士無  
不願死伏惟特寬狂狷不賜誅責生死榮幸無任感恩

上揚相公啓

劉太真

太真啓前者曲蒙處分今獻所學舊文伏念早年僻居  
江介泛窺經典莫究宗源天寶中常遇故揚州功曹蘭  
陵蕭君語及文學許相師授而家貧世亂不克終之其  
後從役外府所用寡細雖抱宿心無因警發雖欲奔前  
賢之墻宇揖作者之風度涉隅角而輒滯望端倪而自  
失常有一言適至理一章逸遺恨竊懷恥愧不覺淹久  
以深稽命之罪寧負厚顏之愧謹上近所記錄三十餘



章反復內省慚惶汗流伏惟相公秉人文以作相敷天  
縱之盛美發六籍以立言極三才之奧義協贊一德化  
成群有懸衡而制其輕重操繩而審其曲直小人既無  
學術又無材用形神低悴年贖頹老又念頃日曾霑引  
問繫蒙而恒失所對庸劣而竟無上補今復以此昧塵  
明鑑相公假為之納其瑕穢小人亦自重其嫌斥乎  
向使彊仕之閒獲趨門館荷深仁於括匠被君子之善  
誘雖其頑魯或有庶幾之道焉今過五十已加其四學  
之已困力又不足遇伯樂而反惡於長鳴視妣姜而自  
退其陋質抑小人之命也不敢多言謹啓

上令狐相公詩啓

元微之

某啓某初不好文徒以仕無他岐強由科試及有罪譴  
棄之後自以為廢滯潦倒不復以文字有聞於人矣曾

不知好事者挾摘芻蕘塵穢尊重竊承相公直於廊廟  
問道某詩句昨又面奉教約今獻舊文戰汗悚懼慙忝  
無地某始自御史府謫官於外今十餘年矣閒誕無事  
遂用力於詩章日益月滋有詩句十餘首其閒感物寓  
意可備矇瞽之諷達者有之詞直氣麤罪戾是懼固不  
敢陳露於人惟盃酒光景閒屢為小碎篇章以自吟暢  
然以為律體卑下格力不揚苟無姿態則陷流俗常欲  
得思深語近韻律調新屬對無差而風情自遠然而病  
未能也江湖閒多有新進小生不知天下文有宗主妄  
相倣效而又從而失之遂至支離褊淺之詞皆自為元  
和詩體某又與同門生白居易友善居易雅能為詩就  
中愛驅駕文字窮極聲韻或為千言或為五百言律詩  
以相投寄小生自審不能有以過之往往戲排舊韻別



創新詞名爲次韻蓋欲以難相挑耳江湖間爲詩者或相倣效或力不足則至於顛倒語言重復首尾韻同意等不異於篇亦自爲元和詩體而司文者考變雅之由往往歸咎於某嘗以爲雕蟲小事不足自明聞相公記憶累旬已來實懼糞土之墻庇於大厦使不復摧壞亦爲板築者之誤輒敢繕寫古體詩歌一百首一百韻至兩韻律詩又一百首今爲五卷奉啓跪陳或希構厦之餘一賜觀覽知小生於章句中櫟櫨榱桷之材盡曾量度則十餘年之遭迴不爲無所用心耳詞旨瓊劣冒黷尊嚴伏俟刑書不敢逃讓死罪死罪

宋

賀韓魏公啓

王介甫

伏審判府司徒侍中寵辭上宰歸榮故鄉兼兩鎮之節

麾備三公之典榮貴極富溢而無亢滿之累名遂身退而有褒加之崇在於觀瞻孰不慶羨伏惟某官受天閒氣爲世元龜誠節表於當時德望冠乎近代典司密命摠攬中權毀譽幾至於萬端夷險常持於一意故四海以公之用捨一時爲國之安危越執鵬樞遂躋元輔以人才未用爲大恥以國本不逮爲深憂言衆人之所未嘗任大臣之所不敢及臻變故果有成功英宗以哀疾荒迷慈聖以謙冲退託內揆百官之衆外當萬事之微國無危疑人以靜一周勃霍光之於漢能定策而終以致疑姚崇宋璟之於唐善致理而未嘗遭變記在舊史號爲元功未有獨運廟堂再安社稷弼亮三世教寧四方岷然在諸公之先煥乎如今日之懿若夫進退之當於義出處之適其時以彼相方又爲特羨某久於庇賴



實預甄收職在近仁欲致蓋規之義世當大有更懷下  
比之嫌用自絕於高閑非敢忘於舊德遂聞新命竊仰  
遐風瞻望門闌不任鄉往之至

上宋相公啓

比者冒躋官次榮託使車躬裁瑣瑣之文私布惓惓之  
意干磨爲吝震疊于懷會走幹之鼎來辱騰書而寵答  
優爲體貌略去等夷繫獎予之大隆滋回皇之失次恭  
審鎮臨以簡保御惟和積有休祥來護興寢伏况某官  
風華靈茂天韻閑深早冠冒於士人亟奮祥於朝野讜  
言善策發爲天子之光厚實羨名布在輿人之誦惟江  
都之舊壤乃天塹之上游地接京師聊倚諸侯之重民  
瞻巖石方圖師尹之賢曾是頑踈終然庇賴尚茲嬰薄  
未即趨馳

賀歐陽少師啓

蘇子瞻

伏審抗章得謝釋位言還天眷雖隆莫奪已行之志士  
流太息共高難繼之風凡在庇庥共增慶慰伏以懷安  
天下之公患去就君子之所難世靡不知人更相笑而  
道不勝欲私於爲身君臣之恩係縻之於前妻子之計  
推輓之於後至於山林之士猶有降志於垂老而况廟  
堂之舊欲使辭福於當年有其言而無其心有其心而  
無其決愚智共蔽古今一塗是以用舍行藏仲尼獨許  
於顏子存亡進退周易不及於賢人自非智足以周知  
仁足以自愛道足以忘物之得喪志足以一氣之盛衰  
則孰能見幾禍福之先脫屣塵埃之外常恐茲世不見  
其人伏惟致政觀文少師全德難名巨材不器事業不  
朝之望文章百世之師功存社稷而人不知躬履艱難



而節乃見縱使耄期篤老猶當就見質疑而乃力辭於  
未及之年退記以不能而止大勇若怯大智如愚至貴  
無軒冕而榮至仁不導引而壽較其所得孰與昔多軼  
受知最深聞道有自雖外為天下惜老成之去而私喜  
明哲得保身之全伏暑向闌台候何似伏冀為時自重  
少慰輿情

元

謝嚴東平賜馬啓

康暉

微勞亡有敢及三命之榮小已奚堪遽冒千金之賞所  
賜厚矣何愧如之伏念曄材素無良器非致遠徒勉厲  
驚之志莫成率驥之功無取所裁確然大耳詩書廢棄  
難追韓愈之飛黃鄉里歸來亦乏少游之款段敢忘代  
勞之駿足孰憐負俗之陳人賁然來思念不到此茲蓋

伏遇相公秉鞭作牧如馭臨民名高齊駟之無稱德大  
魯駟之有頌小者大者繫之維之雖病顛之駒謂何飾  
矣至泛駕之馬亦在馭馬不圖衰朽之蹤曲被閑馳之  
惠自矜光寵獲免徒行敢曰據鞍效馬伏波之矍鑠恐  
其鞿韉有杜工部之損傷感佩良深染濡奚罄

謝解啓

閻子靜

芹宮角藝初無黃絹之辭藻鑑垂光誤中青錢之選名  
非情稱感與愧并切惟辭賦之淵源是乃古詩之糟粕  
苟氏子發明其大槩宋大夫鼓舞乎後塵英華秀發則  
洛陽少年文彩風流則臨邛詞客自茲以往作者寢多  
摘章繪句者往往有之操紙染翰者滔滔皆是若孫綽  
擅聲金之美子雲鶴吐鳳之奇一班父子卓冠一時陸  
家弟兄獨步當世莫不振金石鏗鏘之調窮霧縠組麗



之文大而仁義諷諭之至言細而鳥獸草木之多識禁  
踰侈則有東京西京之作辨時事則有吳都蜀都之編  
或上林以諷其畋遊或甘泉以述其郊祀升堂入室然  
未窺孔氏之門墻宣德通情亦庶幾風人之旨趣何此  
源流之降演爲科舉之文一變唐宋尚餘作者之典刑  
百變遼金無復舊家之風骨拘之以聲律之調暢檢之  
以對偶之重輕以窘邊幅爲謹嚴以粘皮骨爲親切描  
題畫影但知一字之工夫抹東塗西不覺六經之破碎  
習非成是以變爲常事馳驟者輒謂之荒唐務雄贍者  
例云乎唱叫雖予建胷中之八斗不得騁其才雖少陵  
筆陣之千軍無以施其勇然有司之獲選亦壯夫所不  
爲何承平歷世而來莫之敢指蓋僥倖一第之外孰知  
其他必待權衡至公之流庶展琴瑟更張之手伏惟提

學郎中先生儒林冠冕學海宗盟憫斯文重厄於秦灰  
贊東國復修乎泮水甄陶後進殿最於春秋二季之閒  
鑑視前車洗滌乎場屋百年之弊俾削拘攣之態庶還  
麗則之風格雖守而必文辭之可觀辭雖尚而亦義理  
之爲主加程文律度於古今骨格之內取古今氣艷於  
程文規矩之中自非卓爾不群之才曷起褒然舉首之  
選如復度青衿小子白面書生學淺鮮而不根氣歲蕤  
而易涸文慚七步才愧八叉僅知弄筆以作文未免尋  
章而摘句五音中度敢論擲地之宮商八表神遊安有  
凌雲之氣象辨作戰蝸之兩角尚慙窺豹之一斑鼯鼠  
之窮顧將奈何黔驢之技蓋止此耳豈意不以非對之  
下體遽令糠粃以先揚敢不益礪操修重鞭鄙鈍進而  
不已雄以當前庶取百中之功不負千金之顧銘心鶚



路謝九秋桂子之風刮眼龍門看二月桃花之浪

文翰類選大成卷第一百四十四



